

मती

1 ¹इबराहिम का बंसज दाउद की सन्तान इसु मसीह की बंसाबली की किताब ।
²इबराहिम से इसहाक पैदा होयो,इसहाक से याकुब,अने याकुब से यहुदा अने उको
भई पैदा होयो , ³ने यहुदा अने तामार से फिरिस ने जोरह पैदा होया,फिरिस से
हिस्रोन अने हिस्रोन से एराम , ⁴ने एराम से अम्मीनादाब पैदा होयो,अम्मीनादाब से
नहसोन अने नहसोन से सलमोन पैदा होयो , ⁵सलमोन अने राहाब से बोअज पैदा होयो,
बोअज अने रुत से ओबेद पैदा होयो अने ओबेद से यिसै , ⁶अने यिसै से दाउद राजो पैदा
होयो । ⁷दाउद से सुलेमान उनी बंइरा से पैदा होयो जो पेंला उरिय्याह की घराळी
थी,सुलेमान से रहबाम पैदा होयो,अने रहबाम से अबियाह ने अबियाह से आसा , ⁸आसा
से यहोसाफात पैदा होयो,अने यहोसाफात से योराम ने योराम से उज्जियाह ,
⁹उज्जियाह से योताम पैदा होयो,अने योतम से आहाज ने आहाज से हिजकिय्याह ,
¹⁰हिजकिय्याह से मनस्से पैदा होयो,अने मनस्से से आमोन ने आमोन से योसिय्याह:
¹¹अने बेबीलोन माय बन्दी होवा का बखत योशिय्याह से यकुन्याह अने उको भई पैदा
होयो । ¹²बेबीलोन माय बन्दी होवा का बाद यकुन्याह से सालतिएल पैदा होयो,अने
सालतिएल से जरुब्बाबिल,अने ¹³जरुब्बाबिल से अबीहद पैदा होयो,अबीहद से
इल्याकीम ने इल्याकीम से अजोर , ¹⁴अजोर से सदोक पैदा होयो,अने सदोक से अखीम
ने अखीम से इलीहुद , ¹⁵इलीहुद से एलीआजार पैदा होयो अने एलीआजार से मत्तान ने
मत्तान से याकुब , ¹⁶याकुब से युसफ पैदा होयो जो मरियम को घराळो थो,अने मरियम
से इसु पैदा होयो जो मसीह केवाय हे । ¹⁷अस्तरां इबराइम से दाउद तोड़ी सगळी चवदा
पीढ़ी होइ,अने दाउद का बखत से बेबीलोन की बन्धुवइ तोड़ी चवदा पीढ़ी ने बेबिलोन की
बन्धुवइ से मसीह तोड़ी चवदा पीढ़ी होइ । ¹⁸अने मसीह को जनम अस्तरां होयो के जदे
उकी मेतारी मरियम की सगई युसफ का साथे होइ,तो उणका मिळवा से पेलांज वा
पवितरआत्मा आड़ी से गरभ से थी ! ¹⁹उको धणी धरमी होवा की वजां से उके बदनाम
नी करवा की मर्जी से छाने-छाने छोड़वा को मनसुबो करीरियो थो । ²⁰पण जदे उ
सोचिजरियो थो तो सरग को एक सरगदुत सपना माय उके यो केता नजर आयो,"हे
युसफ दाउद का बेटा,तू मरियम के अपणी घराळी बणावा से मती डर,क्योके जो उकी
कोख माय हे उ पवितरआत्मा आड़ी से हे । ²¹वा बाळक जणगा अने तू उको नाम इसु
राखजे,क्योके उ अपणा लोग हुंण के उनका पापहुंण से तारी देगा ।" ²²यो सगळो इकासरु

होयो के परभु ने जो बचन नबी से केवआड़ियो थो उ पुरो होय ; ²³"देखो,एक कुंवारी गरब धारेगा,वा एक बाळक जणेगी अने उको नाम इसु राख्यो जायगा ।" जिको अरथ 'परमेसर हमारा साथे,। ²⁴तो युसफ नींद से जागीग्यो अने परमेसर का सरगदुत का हुकम से उके ब्याव करी ने लियायो । ²⁵अने मरियम कने तत्तक नी ग्यो जत्तक उने बाळक नी जण्णयो अने युसफ ने उको नाम इसु राख्यो ।

2 ¹राजा हेरोदेस का दणहुंण माय जदे यहुदिया का बैतलहम माय इसु को जनम होयो ,तो देखो उगणुं आड़ी से जोतिसी यरुसलेम माय पोंहची के पुछवा लाग्या , ²यहुदिहुंण को राजो जिको जनम होयो कां है ? कयोके हमने उगणुं माय उको तारो देख्यो, अने उके परणाम करवा आया है " ³जदे राजा ने यो सुण्यो तो उ अने उका साथे अखो यरुसलेम घबरइग्यो । ⁴तो उने लोग हुंण का सगळा खास याजक हुंण अने सास्तरिहुंण के भेळा करिके उणसे पुछ्यो के मसीह को जनम कां होणो चइये । ⁵उणने उकासे क्यो,"यहदिया का बैतलहम माय कयोके नबी आड़ी से असो लिख्यो ग्यो : MAT002006" ⁶"है बैतलहम,तू जो यहुदा का परदेस माय है,तू यहुदा का हाकिम हुंण माय कोइसे नानो हयनी कयोके थारा माय से एक सासक हिटेगा,जो म्हारी परजा इसराइल को रखवाळो होयगा ।" ⁷राजा हेरोदस ने जोतिसीहुंण के छाने से बुलई उणकासे इनी बात को पतो लगायो के तारो ठीक कदे नजर आयो थो ⁸अने यो कइके उणके बैतलहम मोकलिया,"जाव,उना बाळक को पतो होसियारी से लगाव,जदे उ तमारे मिळीजाय तो म्हारे समिचार दीजो के हुं बी जइके उके परणाम करयऊँ ।" ⁹राजा की बात सुणी के वी चली पड़िया,अने देखो,जेना तारा के उणने उगणुं माय देख्यो थो,उ उणका अगड़े-अगड़े तत्तक चलतो रियो जत्तक के वां पोंहची के उनी जगा अदरे थमीं नी ग्यो जां बाळक थो । ¹⁰वी उना तारा के देखी के घणां खुस होया ।" ¹¹उणने घरमाय जइके उना बाळक के उकी मेतारी का साते देख्यो,अने जमीन पे लोटीके उके धोक द्यो, (सास्टांग परणाम करियो)अने अपणो-अपणो थैलो खोलिके उके सुन्नो,लुबान अने गन्धरस को चड़ावो चड़ायो । ¹²तो सपना माय या चितावणी पइके के हेरोदेस कने पाछा मती जावजो,वी दूसरा मारग से अपणा देस चल्या गया । ¹³जदे वी चल्या गया तो देखो,परभु का दुत ने सपना माय अइने युसफ से क्यो,उठ्या अने बाळक अने,उकी मेतारी के लइके मिसर चल्यो जा अने जत्तक हुं नी कुं वांज रिजे,कयोके हेरोदेस इना बाळक के दुढवा पे हे के उके मरवई लाखे । ¹⁴उ रातेज उठीके बाळक अने उकी मेतारी के लइके मिसर चल्यो ग्यो । ¹⁵अने हेरोदेस का मरिया तोड़ी वइंज रियो,के जो बचण परभु ने नबी से केवाड़ियो थो

पूरण होयो, " म्हने अपणा बेटा के मिसर से तेड़ियो" ¹⁶जदे हेरोदेस ने देख्यो के जोतिसीहुंण ने म्हारा साते दगो करियो तो उने गुस्सा माय अइके हुकम दइ जोतिसीहुंण से तय करिया होया बखत मुजब बैतलहम अने उका ऐरे-मेरे की जगा का सगळा बाळकहुंण के जो दो बरस या इकसे कम था मरवई लाख्या । ¹⁷तो जो बचण यर्मयाह आड़ी से क्यो ग्यो थो पूरण होयो : रामाह माय एक चीख, रोणो अने बिलखणो,राहेल अपणा बाळक सरु रोतां-रोतां सांती नी चावे । क्योके अबे वी नी रिया ।" ¹⁹जदे हेरोदेस मरिग्यो,तो देखो मिसर माय परभु का एक दुत ने युसफ के सपना माय अइके क्यो , ²⁰उठ्या अने बाळक ने उकी मेतारी के लईके इसराइल का देस माय चल्यो जा,क्योके वी जो उके मारी लाखणो चाता था,मरी चुक्या है ।" ²¹उ उठ्यो अने उकी मेतारी के साते लईके इसराइदेस माय आयो, ²²पण या सुणिके के अरखिलाउस अपणा पिता हेरोदेस की जगा पे यहुदिया माय राज करीरियो है,वां जावा से डरियो । फेर सपना माय चितावणी पईके उ गलील का परदेस माय चल्या गया । ²³अने नासरत नामका एक नगर माय जईके रेवा लाग्या,जिकसे के नबीहुंण से क्यो ग्यो बचण पूरण होय, "उ नसरी केवायगा ।"

3 ¹उना दनहुंण माय योहन बपतिस्मा देवा वाळो यहुदिया का माळ माय आयो । उ यो कइके परचार करिया करतो थो : ²"हिरदो बदळो,क्योके सरग को राज कने अइ ग्यो ।" ³यो उज जिको बखाण यासाया नबी ने यो केता होयो करियो,"माळ माय एक हेला पाइवा वाळा को हेलो परभु को मारग तियार करो उकी बाट सुदी बणाव !" ⁴योहन खुद तो ऊँट का रूँवा का लतरा पेरियो अने कमर माय चामड़ा को कमर पेटो बाँध्यो होयो थो अने टिड्ड़िहुंण अने सेत उको भोजन थो । ⁵तो उका कने यरुसलेम,अखो यहुदिया अने यरदन का ऐरे-मेरे का अखा इलाका का लोग हिट्याया , ⁶जसा-जसा उणने अपणा पाप के मान्या;उने उणके यरदन नदी माय बपतिस्मो करियो । ⁷पण जदे उने नरा फरीसीहुंण अने सदुकीहुंण के बपतिस्मो लेवा सरु आता देख्यो तो उनकासे क्यो,"हे सरप का कणाहुंण तमारे केने चेतइ दियो के आवा वाळा करोध से न्हाटो ? ⁸इकासरु अपणा पछतावा लायक फळ बी लाओ : ⁹अने अपना हिरदा माय या मती बिचारो,'हमारो बाप इबराहिम हे,'क्योके हुं तमार से कुं हुं के परमेसर इना भाटाहुंण से बी इबराहिम सरु ओलाद पेदा करी सके हे । ¹⁰कुराड़ो अबे बी झाड़ की जड़ पे धरियो होयो हे, अने हरेक

झाड़ जो अच्छो फल नी लावे, काट्यो अने लाय माय लाख्यो जाय हे । ¹¹ हुं तो तमारे पाणी से बपतिस्मो दूँ हुं , पण जो म्हारा पाछे अइ रियो हे-उ म्हारसे इतरो सक्तीसाली हे के हुं उका जूता उठावा लायक बी हयनी-उ खुद तमारे पवित्तरातमा अने लाय से बपतिस्मो करेगा । ¹² उको सुपड़ो उका हात माय हे । उ अपणो खळो पुरो सोरेगा, अने अपणा गँउ के गल्ला माय भेळा करेगा, पण सुक्ला के उनी लाय माय बाळेगा जो बुजवा की हयनी । ¹³ तो इसु यरदन का कराड़े योहन कने आयो के उकासे बपतिस्मो ले । ¹⁴ पण योहन या कईके उके रोकवा लाग्या, "म्हारे तो थारसे बपतिस्मो लेवा कि जरुवत हे, अने (कई) तू म्हारा कने आयो हे ?" ¹⁵ पण इसु ने जवाब द्यो, "इना बखत तो असोज होवा दे, क्योके हमारा सरु ठीक हे के अस्तरां सगळी धारमिकता के पूरण करां ।" तो उने उकी बत मानी ली । ¹⁶ बपतिस्मा लेवा का बाद इसु झट पाणी से बायरे हिट्यो अने देखो, अस्मान खुलिग्यो, अने परमेसर का आतमा के कबुतर सरिको उतरतो अने अपणा अदरे आतो देख्यो । ¹⁷ अने देखो, या अकासबाणी होई: "यो म्हारो परेमिलो बेटो हे जिकासे हुं घणो खुस हुं ।"

4

¹ तो आतमा इसु के माळ माय लइ ग्यो के सेतान से उकी अजमाइस होय । ² जदे उ चाळीस दन अने चाळीस रात उपास करि चुक्यो तो उके भुक लागी । ³ अने अजमाइस करवा वाला ने कने अईके उकसे क्यो, "अगर तु परमेसर को बेटो हे तो हुकम दइके के ई भाटाहुंण रोटा बणी जाय ।" ⁴ पण उने ज्वाब द्यो, यो लिक्ख्यो हे, 'मनख सिरफ रोटा सेज नी, पण हरेक बचण से जो परमेसर का मुंडा से हिटे हे, जिंदो रेगा ।' ⁵ तो सेतान उके पवित्तर नगर माय लइ ग्यो अने मन्दर की चौंटी पे उबो करिके, ⁶ उने उकासे क्यो, "अगर तु परमेसर को बेटो हे तो खुदीके निच्चे पटकी लाख ;क्योके लिक्ख्यो हे, उ थारा बारा मे अपणा दुतहुंण के हुकम देगा, अने वी थारे अदरेक का अदरेज झेली लेगा, कइ असो नि होय के थारा पगहुंण माय भाटा से ठेस लागे ।" ⁷ इसु ने उकासे क्यो, यो बी लिक्ख्यो हे: 'परभु अपणा परमेसर के अजमा मत, ।' ⁸ फेर सेतान उके एक नरा उंच्या बल्ड़ा पे लइ ग्यो, अने जगत को अखो राज अने एसआराम (विभव) देखाड़ीके ⁹ उने क्यो, "अगर तु म्हारे लोटिके धोक दे तो हुं यो सगळोकंड थारे दइ दुंवा ।" ¹⁰ तो इसु ने उकसे क्यो, "हे सेतान, दुरो न्हाट, क्योके लिक्ख्यो हे, तु परभु अपणा परमेसर के धोक दे- अने सिरफ उकीज भगती कर, ।" ¹¹ तो सेतान उके छोड़िके चल्यो ग्यो, अने देखो, सरगदुत अइके उकी सेवा-चाकरी करवा लाग्या । ¹² अने जदे उने सुण्यो के

योहन् बन्दी बणइ ल्यो ग्यो हे ,तो उ गलील चल्थो ग्यो । ¹³ अने उ नासरत के छोड़ीके कफरनहुम माय जो सरवर का कराड़े जबुलुन अने नसाली का ईलाका माय हे ,रेवा लाग्यो । ¹⁴ जिकसे के वा बात जो यासाया नबी से कवईगी थी पुरण होय: ¹⁵ "जबुलुन अने नसाली का देस ,सरवर का मारग से यरदन पेलांपार ,गेरयहुदिहुंण को गलील- ¹⁶ जो मनख इंदारा माय बेठ्या था उणने बड़ो उजाळो देख्यो । जो मोत का देस अने छायाळा माय बेठ्या था, उणपे एक जोत चळकी ।" ¹⁷ उना बखत से इसु यो परचार करनो अने केणो सुरु करियो: "मन बदळो ,क्योके सरग को राज कने अइग्यो हे ।" ¹⁸ गलील सरवर का कराड़े चलता होया उने दो भईहुंण के याने सिमोन जो पतरस केवातो थो अने उको भई अन्दियास के सरवर माय जाळ लाखता देख्या; वी तो भोई था । ¹⁹ उने उणका से क्यो , "म्हारा पाछे हुई जाव । हुं तमारे मनख के पकड़वा वाळो बणउंवां ।" ²⁰ वी झट जाळहुंण के छोड़ीके उका पाछे चली पड़िया । ²¹ वां से आगे बड़ीके उने दुसरा भईहुंण, याने जब्दी को बेटो याकुब अने उको भई योहन् के देख्यो जो अपणा बाप जब्दी का साते नाव पे जाळहुंण सांधी रिया था, अने उने उणके तेड़िया । ²² वी झट अपनी नाव अने पिता के छोड़िके उका पाछे चली पड़िया । ²³ इसु अखा गलील माय डोलतो-फिरतो उणका पराथनाघरहुंण माय परबचण देतो, राज को सुबसमिचार परचार करतो, अने मनखहुंण की हरतरां की बेमारी अने हरतरां की कमजोरी के परे करतो फिरियो । ²⁴ अने उकी चरचा अखा सीरिया माय फेलिग्यी अने लोग नरा बेमारहुंण के जो नरीतरां की बेमारीहुंण अने दुखहुंण से पीड़ित था, अने जिणका माय बुरी आतमा थी, मरगी वाळाके, लकवा मारिया होया सगाळा के उका कने लाया, अने उने उणके अच्छो करियो । ²⁵ अने गलील अने दिकापुलिस अने यरुसलेम अने यहुदिया अने यरदन नददी का पेलापार से हुजुम को हुजुम उका पाछे चली पड़ियो।

5 ¹ इनी भीड़ के देखी के उ परबत पे चड़िग्यो, अने जदे बेठिग्यो तो उका चेलाहुंण उका कने आया । ² तो उ अपणो मुन्डो खोलिके उणके यो परबचण देवा लाग्यो; ³ "धन हे वी जो मन का सुदा हे ,क्योके सरग को राज उणकोज हे । ⁴ धन हे वी जो दुख्या हे क्योके वी तस्सल्ली पायगा । ⁵ धन हे वी जो नरम हे ,क्योके वी धरती का हाकिम होयगा । ⁶ धन हे वी जो धरम का भुका अने तिरसिया हे, क्योके वी तिरप करिया जायगा । ⁷ धन हे वी जो दयालु हे ,क्योके उणका पे दया करी जायगा । ⁸ धन हे वी

जिणका हिरदा साफ हे,क्योके वी परमेसर के देखेगा । ⁹धन हे वी जो मेळ करवाणे वाला हे ,क्योके वी परमेसर का बेटा केवायगा । ¹⁰धन हे वी जो धरम सरु सताड़िया जाय हे,क्योके सरग को राज उणकोज हे । ¹¹धन हो तम,जदे लोग म्हारा सरु तमारे कोसे,तमारे दुःख दे अने झुठ बोली-बोली के तमारा बिरोध माय सगळी तरां की बातहुंण के - ¹²खुस अने मगन रो,क्योके सरग माय तमारा सरु फळ बड़ो हे । उणने तो उना नबीहुंण के बी जो तमार से पेलां होया था अस्तरां सताड़िया था । ¹³तम धरती का लुण हो । पण अगर लुण खुद सुवाद खोई दे तो उ पाछो किकसे खारो करियो जायगा ? उ कंई काम को हयनी सिरफ इका के बायरे फेंक्यो जाय अने मनख का पग तळे कुचळ्यो जाय । ¹⁴तम जग का उजाळा हो । परबत पे बस्यो होयो नगर छिपी नी सके । ¹⁵तमारो उजाळो मनखहुंण का सामे अस्तरां चिळके के वी तमारा अच्छा कामहुंण देखीके तमारा पिता की, जो सरग माय हे,बढ़ई करे । ¹⁶लोग दियो बाळी के टोपला का निच्चे नी पण अदरे धरे, अने उ घर का सगळा मनख के उजाळो करे हे । ¹⁷यो मती जाणो के हुं नेम अने नबीहुंण की किताब के खतम करवा आयो । खतम करवा नी, पण पुरण करवा आयो हुं । ¹⁸क्योके हुं तमार से साँची कूं के जत्तक असमान अने धरती टळी नी जाय,नेम माय से इक हरुक अने टिपकी बी, जत्तक के सबकंई पूरन नी हुई जाय,नी टळेगा । ¹⁹इकासरु जो बी इना नाना से नाना हुकम के नी मानेगा अने असीज सिक्छा दुसरा के देगा,उ परमेसर का राज माय नानो से नानो केवायगा;पण जो उणको पाळन करे अने दुसरा के बी सिखाड़ेगा,उ परमेसर का राज माय बड़ो केवायगा । ²⁰क्योके हुं तमार से कूं के जत्तक तमारो धरमीपण सास्तरी अने फरीसिहुंण का धरमीपण से जादो हयनी तो तम परमेसर का राज माय भितरे कदी जई नी सकोगा । ²¹“ तम सुणि चुक्या हो के पुरखाहुंन से क्यो ग्यो थो,‘ धात नी करणों’ अने ‘ जो धात करेगा, उ कचेरी माय सजा का लायक ठेरेगा ।’ ²²पण हुं तमार से कूं के हरेक जो अपणा भई पे करोध करे उ कचेरी माय सजा का लायक ठेरेगा;अने जो कोई अपणा भई के निकम्मो केगा उ बड़ी कचेरी माय दोसी ठेरेगा ;अने जो कोई केगा,‘ अरे मुख,’ उ नरक की लाय का सजा लायक होयगा । ²³इकासरु अगर तू अपणो चड़ावो बेदी कने लाय अने वां थारे रियाद आय के म्हारा भई के म्हारा आड़ी से कंई बिरोध हे , ²⁴तो अपणो चढ़वो बेदी का सामे लाख अने जइके पेलां अपणा भई से मिळाप करिले अने पाछो अईके अपणो चड़ावो चड़ा । ²⁵जदेकी तू मारग मेज अपणा वादी का साते हे ,तो उकासे झट मेल-मिळाप करिले ,कंई असो नी होय के वादी थारे न्यावधिस का सुपरद करिदे ,अने न्यावधिस थारे

हाकिम का,अने तु जेलखाना माय लाख्यो जाय । ²⁶हुं थारसे साँची कूँ,जतक तु पर्ई-पर्ई चुकई नी लाखे ततक वां से छुटि नी सकेगा । ²⁷तम सुणि चुक्या हो के क्यो ग्यो थो,ब्योबिचार नी करणो , ²⁸पण हुं तमार से कूँ के जो कोई पराई बंईरा पे बुरी नजर लाखे उ अपणा मन माय उकासे ब्योबिचार करी चुक्यो । ²⁹अगर थारी जीवणी आँख थार से पाप कराये तो तु उके हेड़ी के फेंकी लाख,क्योके थारा सरु यो भलो के थारा अंगहुंण माय से एक नास होय असो नी के थारी अखी काया नरक माय लाखी जाय । ³⁰ अगर थारो जीवणो हात थार से पाप कराय तो उके काटी के दुरो फेंकी लाख क्योके थारा सरु योज भलो हे के थारो एक अँग नास हुई जाय,असो नी के थारी अखी काया नरक माय लाखी जाय । ³¹यो क्यो ग्यो थो ;'जो कोई अपनी बंईरा के फारकती देणो चाय उ उके फारकती दर्ईदे', ³²पण हुं थारसे कूँ के हरेक जो ब्योबिचार के छोड़िके दुसरा केना कारण से अपनी धराळी के फारकती दे,तो उ उकासे ब्योबिचार कराय हे । अने जो कोई फारकती दर्ई होय से ब्याव करे,उ ब्योबिचार करे हे । ³³फेर,तम सुणिचुक्या हो के पुरखाहुंण से क्यो ग्यो थो,'तम झुटी सोगन मती खावजो,पण परभु सरु अपनी सोगनहुंण को पुरण करजो ।'³⁴पण हुं तमार से कूँ हुं के कदी सोगन मती खाजो; नीतो सरग की, क्योके उ परमेश्वर को सिंगासण हे; ³⁵नीज धरती की,क्योके वा उका पगहुंण की चोकी हे; नीज यरुसलेम की,क्योके उ महाराज को नगर हे । ³⁶अपणा माथा की बी सोगन मती खाजो, क्योके तु अपणा एक बाल के बी धोळो या काळो नी करी सके । ³⁷पण तमारी बात हां की हां अने नी की नी रे,क्योके जो कई इकसे जादा होय हे ,सेतान आड़ी से होय हे । ³⁸तमने सुण्यो हे के क्यो ग्यो थो,आँख का बदळे आँख अने दाँत का बदळे दाँत । ³⁹पण हुं तमार से कुं के बुरा को सामों नी करणो पण जो थारा जिवणा गाल पे झापड़ मारे तो उका आड़ी दुसरो फेरी लाख । ⁴⁰अने अगर कोई थारपे दावो करिके थारो कुड़तो लेणो चावे तो उके कोट बी लई लेवा दे । ⁴¹अने अगर थारे कोई बेगार माय एक कोस लई जाय,तो उका साते दो कोस चल्यो जा । ⁴²जो थारसे मांगे उके दे ,अने जो थारसे उदार लेणो चावे उकासे मन्डो मति फेर । ⁴³तम सुणिचुक्या हो के क्योग्यो थो,'तू अपणा पड़ोसी से परेम राखजे अने अपणा बेरी से बेर । ⁴⁴पण हुं तमार से कूँ, अपणा बेरीहुंण से परेम राखो अने जो तमारे सताड़े,उणका सरु बिणती करो । ⁴⁵जिकासे के तम अपणा सरग पिता की सन्तान बणी सको ,क्योके उ अपणो सूरज भला अने बुराहुंण दोई पे उगाड़े हे ,अने धरमिहुंण अने अधरमिहुंण दोई पे पाणी बरसावे हे । ⁴⁶क्योके तम उणकासे परेम राखो जो तमार से

परम राखे तो तमारे कई फल मिळेगा ? ⁴⁷ अगर तम सिरफ अपना भईहुंण केज परणाम करो हो तो कांको बड़ई को काम करो हो ? कई गेरजात (गेर यहुदिहुंण) असोज नी करे ? ⁴⁸ तो तम सिध्द बणो ,जसो के तमारो सरग पिता सिध्द हे ।

6 ¹"होसियार ! तम अपना धरम का काम मनख के दिखावा सरु मती करो ,नी तो अपना सरग पिता से कईज फल नी पावगा । ²इकासरु जद तू दान करे तो अपना अगड़े-अगड़े बाजो (तुरही के बदले) मती बजवा,जसा ढोंगी लोग, सभाहुंण अने सेरीहुंण माय करे हे के लोग उणको मान करे । हुं तमार से साँची - साँची कूँ के वी अपणो फल पुरण रुप से पई चुक्या हे । ³पण जद तू दान करे तो थारो जिवणो हात नी जाणने पाय के थारो डाबो हात कई करिरीयो हे । ⁴जिकासे थारो दान गुप्त रे , अने थारो पिता जो गुप्त माय देखे थारे फल दे । ⁵जदे तू पराथना करे तो ढोंगीहुंण सरीको नी,क्योके लोगहुंण के देखावणे सरु पराथनाघरहुंण अने बाट का मोंड़हुंण पे उबी के पराथना करणो उणके भाय हे । हुं तमार से साँची कूँ के वी अपणो पुरो फल पई चुक्या । ⁶पण जदे तू पराथना करे तो अपणी भितरे कि कोठड़ी माय जा अने किंमाड़ बन्द करिके अपना पिता से जो गुप्त माय हे पराथना कर ,अने थारो पिता जो गुप्त माय देखे थारे फल देगा । ⁷अने जदे पराथना करे तो गेरजातहुंण जसा बेमतलब कि बातहुंण घड़ी-घड़ी मती कर,क्योके वी सोचे हे के उणका जादा बोलवा से उणकी सुणी जायगा । ⁸इकासरु उणका सरिका नी बणनो, क्योके तमारो पिता मांगवा से पेंलाज तमारी जरुवत के जाणे हे । ⁹"तो तम अस्तरां पराथना करजो;हे हमारा पिता,तू जो सरग माय हे,थारो नाम पवितर मान्यो जाय । ¹⁰थारो राज आय । थारी मरजी जसी सरग माय पुरन होवे हे,असीज धरती पे भी पुरण होय । ¹¹हमारा दन भर का रोट(मालवी में रोट पुर्लिंग है) आज हमारे दे । ¹²अने जसे हमने अपना कसूरवारहुंण के मांफ करिया असाज हमारा कसुरहुंण के मांफ कर ; ¹³अने हमारे अजमाइस माय मती ला पण बुरई से बचाइ ; क्योके राज पराकरम अने म्हेमा सदाज थारी रे । आमीन । ' ¹⁴अगर तम मनख का कसुर मांफ करोगा तो तमारो सरगपिता बी तमारे मांफ करेगा । ¹⁵पण अगर तम मनखहुंण का पाप मांफ नी करो तो तमारो पिता बी तमारा कसुर मांफ नी करेगा । ¹⁶जद कदी तम उपास करो तो ढोंगीहुंण सरिका उदास नजर मती आव ,क्योके वी अपणो मुन्डो कुमलायो होयो राखे जिकासे के मनख के उपसी नजर आय । हुं तमार से साँची कूँ के वी अपणो फल पई चुक्या । ¹⁷पण तु जदे उपास राखे तो अपना माथा पे तेल मल अने मुन्डो धो , ¹⁸जिकासे के तु मनखहुंण के उपासी नजर नी आय,पण अपना

पिता के जो गुप्त माय हे ;अने थारो पिता जो गुप्त माय देखे ,थारे इकोफळ देगा ।
¹⁹अपणा सरु धरती पे धन भेळो मती करो ,जां किड़ो ने किट नास करे अने जां चोळ्ड़ो खाद दईके चोरी करे । ²⁰पण अपणा सरु सरग माय धन भेळा करो ,जां नी तो किड़ो अने नी किट नास करे अने नीज चोळ्ड़ो खाद दई चोरी करे , ²¹क्योके जां थारो धन हे वांज थारो मन बी लाग्यो रेगा । ²²काया को दियो आँख । इकासरु अगर थारी आँख साफ हे,तो थारी अखी काया उजाळी रेगा । ²³पण अगर थारी आँख खराब होय तो थारी अखी काया इन्दारी रेगा । इकासरु जो उजाळो थारा माय हे ,अगर उज इन्दारो हे, तो यो इन्दारो कसो काळो (घोर) होयगा ! ²⁴कोइंज मनख दो मालेखहुंण की सेवा-चाकरी (चाकरी,सेवा के साथ अवश्य जुड़ता हे) नी करी सके, क्योके उ एक से बेर अने एक से परेम राखेगा ,या उ एक से मिळ्यो रेगा अने दुसरा को मानपाड़ेगा (तुच्छ)। तम परमेसर अने धन दोई की सेवा-चाकरी नी करी सको हो । ²⁵एनी वजा हुं तमार से कूँ के अपणा पराण सरु या फिकर मति करजो के हम कंई खावांगा अने कंई पिवांगा,अने नीज अपणी काया सरु के कंई पेरांगा । कंई पराण भोजन से अने काया लतरा से बड़िके हयनी ? ²⁶अस्मान का पखेरुहुंण के देखो के वी नी तो बोय ,नी काटे अने नीज खळाहुंण माय भेळा करे ,फेर बी तमारो सरगपिता उणके खवाड़े हे । कंई तमारो मोल उणकासे बड़ीके हयनी ? ²⁷तमारा माय से असो कुंण जो फिकर करिके अपणी उमर की एक घड़ी बी बड़ई सके ? ²⁸लतरा सरु तम कायलेणे फिकर करो ? माळ (का) फूळहुंण के देखो के वी कसे बड़े ! वी नी तो मेनत करे अने नी काते , ²⁹फेर बी हुं तमार से कूँ के सुलेमान बी ,अपणा अखा विभव माय उणका माय से एक का सरिका बी लतरा पेरिया होयो नी थो । ³⁰इकासरु अगर परमेसर माळ की घाँस के जो आज हे अने काल भट्टा माय झोकि जायगा ,अस्तरां सजावे ,तो हे कमबिसासीहुंण ,उ तमारा सरु कायलेणे इणका से जादा नी करेगा ? ³¹इकासरु या कइके फिकर (बिचारो) मती करो के हम कंई खावांगा ? या 'कंई पिवांगा ?' ने कंइ पेरांगा ?' ³²क्योके गेरजातहुंण बड़ा जतन(खुसी) से इनी सगळी चीजहुंण की हेर(खोज) माय रे ,पण तमारो सरगपिता जाणे हे के तमारे इनी सगळी चीजहुंण कि जरुवत हे । ³³पण तम पैला परमेसर का राज अने उका धरम का सोद माय लग्या रो तो ई सगळी चीजहुंण तमारे दई दी जायगा । ³⁴इकासरु काल की फिकर मती करो ,क्योके काल को दन अपणी फिकर खुद करी लेगा । आज का सरु आज कोज दुःख नरो हे ।

7 ¹दोष मति लगाड़ो जिकासे तमार पे बी दोष नी लगाड़ियो जाये । ²क्योके जस्तरां तम दोष लगाड़ो,अस्तरा तमार पे बी दोष लगाड़ियो जायगा । अने जेना नाप से तम नापो,उनाज नाप से तमारा सरु बी नाप्यो जायगा । ³तु कायसरु अपणा भई की आँख को तिरकलो देखे, अने अपणी आँख को लट्ट थारे नी सुजे ? ⁴अने अपणा भई से कसे कई सके , 'आ, हुं थारी आँख से तिरकलो हेड़ी लाखूँ', जदेकी लट्ट तो खुद थारी आँख माय हे ? ⁵हे ढोंगी ,पैला खुद की आँख को लट्ट हेड़िले, फेर थारे अपणा भई की आँख को तिरकलो हेड़वा सरु साफ नजर आवेगा । ⁶पवितर चीज कुतराहुंण के मती लाखो, अने अपणा मोती सूल्ड़ाहुंण का अगड़े मती लाखो, कई असो नी होय के वी उणके पग तळे घुंदे अने पलटी के तमारे फाड़ी लाखे । ⁷मांगोगा तो तमारे मिळेगा ,सोदो तो पावगा ,खटखटाड़ो तो तमारा सरु खोल्यो जायगा । ⁸क्योके हरेक जो मांगे, उके मिळे ,अने जो सोदे उ पाय ,अने जो खटखटाड़े उका सरु खोल्यो जायगा । ⁹तमारा माय असो कुंण हे जो अपणा बेटा के जदे उ रोटा मांगे तो उके भाटा दे ? ¹⁰या मच्छी मांगवा पे सरप दे ? ¹¹तो जदे तम बुरा हुड़के अपणा बाळकहुंण के भली चीजहुंण देणो जाणो हो तो तमारो पिता जो सरग माय हे अपना मांगणे वाळाहुंण के भली चीजहुंण हजु जादा कायसरु नी देगा ? ¹²इकासरु जसा के तम चाव के मनख तमारा साते करे , तम बी उणका साते वसोज करो, क्योके नेम अने नबी योज सिखाड़े हे । ¹³सांकड़ा फाटक से भितरे जाव; क्योके बड़ो हे उ फाटक अने चोड़ो हे उ मारग जो नास आड़ी लई जाय हे ,अने नरा हे जो उकामे जाय हे । ¹⁴पण नानो हे उ फाटक अने साँकड़ो हे उ मारग जो जीवन आड़ी लई जाय अने थोड़ाज हे जो उके पाय हे । ¹⁵झुठा नबीहुंण से होसियार रो जो गाडरहुंण का भेष माय तमारा कने आवे हे, पण भितरे से वी भुक्या, फाड़ी लाखणे वाळा बरगड़ा हे । ¹⁶उणका फळहुंण से तम उणके जाणी लोगा । कई कांटाळी झांडीहुंण से अंगूर अने कांटाहुंण से अंजीर तोड़िया जाय । ¹⁷अस्तरां हरेक अच्छो झाड़ अच्छो फळ दे ,पण बुरो झाड़ बुरो फळ दे हे । ¹⁸अच्छो झाड़ बुरो फळ नी दई सके अने नीज बुरो झाड़ अच्छो फळ दई सके । ¹⁹हरेक झाड़ जो अच्छो फळ नी दे ,काट्यो अने लाय माय झोकी लाख्यो जाय हे । ²⁰तो तम उणके फळहुंण से जाणी लोगा । ²¹हरेक जो म्हार से, 'हे परभु ! हे परभु ! के हे ,सरग का राज माय जई नी सके ,पण जो म्हारा सरगपिता की मरजी पे चले, उज भीतरे जाइ सकेगा । ²²उना दन नरा लोग म्हार से केगा, ' हे परभु ,हे परभु ,कई हमने थारा नाम से अगमवाणी नी करी अने थारा नाम से बुरी आतमाहुंण के नी हेड़ी

अने थारा नाम से नरा अचरज का काम नी करिया ?' ²³ तो हुं उणकासे साफ कुंवा, म्हने तमारे कदी नी जाण्या; हे बुरा काम करण्याहुंणो, म्हार से छेटी चल्या जाव । ²⁴ इकासरु जो कोई म्हारा इना बचणहुंण के सुणीके उणका पे चले ,उ उना ज्ञानी मनख सरिको हे ,जिने अपणो घर सिल्ला पे बणायो । ²⁵ अने पाणी पड़ियो, पूर अई, अन्धीहुंण अई अने उना घर से टकरई; फेर बी उ नी पड़ियो ,क्योके उकी नीम सिल्ला पे राखी थी । ²⁶ पण जो कोई म्हारा इना बचणहुंण के सुणे अने उणको पाळन नी करे, उ उना मुख सरिको जिने अपणो घर बाळु पे बणायो । ²⁷ अने पाणी पड़ियो, पुरहुंण अई, अन्धीहुंण अई अने उना घर से टकरई; तो उ पड़ियो । 'अने पुरो नास हुइग्यो ²⁸ इको असर यो होयो के जदे इसु इ बात कई चुक्यो तो भीड़ उका परबचण से दंग री गई, ²⁹ क्योके उ उणके सास्तरीहुंण सरिको नी ,पण हक से परबचण दई रियो थो ।"

8 ¹ जदे उ परबत पे से उतरियो ,तो एक बड़ो हुजुम उका पाछे चली पड़ियो । ² अने देखो तो, एक कोड़ियो उका कने आयो, अने परणाम करिके केवा लाग्यो, "हे परभु अगर तु चाय तो म्हारे ठीक करी सके । ³ इसु ने हात अगड़े करिके उके पकड़ियो अने क्यो, "हुं चउ । तु अच्छो हुइजा, "अने कोड़ियो झट अच्छो हुइग्यो ⁴ अने इसु ने उकासे क्यो, देखतो ,कोई से कीजे मती, पण जईने याजक के बताइ ,अने मूसा ने जो चड़ावो ठरायो चड़ा के उणका पे गवई रे ।" ⁵ अने जदे उ कफरनहुम भीतरे आयो, तो एक सुबेदार उका कने आयो अने बिणती करिके ⁶ केवा लाग्यो, हे परभु, म्हारो नोकर लकवा को मारियो घर माय पड़ियो होयो घणा दरद से तड़पी रियो हे ।" ⁷ उने उकासे क्यो, " हुं अईके उके अच्छो करूँवा ।" ⁸ पण सुबेदार ने ज्वाब मे क्यो, "हे परभु, हुं इका लायक हयनी के तु म्हारा घरे आय ,पण सिरप बोलिदे म्हारो नोकर अच्छो हुइ जायगा । ⁹ क्योके हुं बी सासन का हात निच्चे हुं ,अने म्हारा हात निच्चे सिपई । जदे हुं एक से कूँ ,जा ! तो उ चल्यो जाय अने जदे नोकर से कूँ ,यो कर !" तो उ करे, ।" ¹⁰ जदे इसु ने यो सुण्यो तो अचम्बो करियो अने अपणा पाछे आवा वाळाहुंण से क्यो , "हुं तमारे साँची कूँ, म्हने इसराइल का कोइ मनख मायज असो बड़ो बिसास नी पायो । ¹¹ हुं तमार से कूँ के उगणुं अने आथणु से नरा लोग अईके इबराहिम, इसाक अने याकुब का साते सरग राज माय जिमवा बेठेगा, ¹² पण राजपुत्र बायरे इन्दारा माय फेकी लाखी जायगा; जाँ रोणो अने दाँत पिसणो होयगा ।" ¹³ अने इसु ने सुबेदार से क्यो , "चल्योजा, थारा बिसास का मुजबज

थारा सरु होय ।"अने नोकर उनीज घड़ी अच्छो हुइग्यो । ¹⁴अने जदे इसु पतरस का घरे आयो,तो उकी सासु के बुखार माय बिछावणा पे पड़ी देखी । ¹⁵उने उके हात लगाड़ियो अने उको बुखार उतरिग्यो,अने वा उठीके सेवा-चाकरी करवा लागी । ¹⁶अने जदे दन अस्तियो,तो वी नरा बुरी आतमा से भरिया होया लोगहुंण के उका कने लाया अने सिरप उका बोलवा पेज उनी बुरी आतमाहुंण के हेड़ी अने सगळा जो बेमार था के अच्छा करिया , ¹⁷जिकासे के जो बचण यासाया से केवायो ग्यो थो उ पूरण होय:"उने खुद हमारी कमजोरीहुंण के लईली अने बेमारीहुंण के परे लाखी ।" ¹⁸इसु ने जदे अपणा चारी आड़ी हुजुम के देख्यो,तो उने पेलां पार जावा को हुकुम द्यो । ¹⁹अने कसा सास्तरी ने अईके उके क्यो , "गरु, जां कंई तु जायगा,हुं थारा पाछे चलुंवा ।" ²⁰इसु ने उकासे क्यो,"व्याकसळीहुंण की खो अने असमान का पखेरुहुंण का घोंसळा होय,पण मनख का बेटा सरु माथो धरवा सरु बी कंई जगा हयनी ।" ²¹उका चेलाहुंण माय से कोइने उकासे क्यो,"परभु,पैला म्हारे हुकम दे के हुं जईने म्हारा पिता के गाड़ दूं ।" ²²पण इसु उकासे क्यो ,म्हारा पाछे चल्थो आ अने मुरदाहुंण के मुरदा गाड़वा दे ,।" ²³जदे उ नाव पे चड़ीग्यो तो उका चेला उका पाछे चली पड़िया । ²⁴अने देखोतो,समन्दर माय बड़ो बगोळियो उठ्यो जिकासे नाव लेरहुंण से ढंकीग्यी;पण उ सोइरियो थो । ²⁵वी उका कने आया अने उणने यो कइके उके जगाड़ियो, परभु ,हमारे बचाड़ ! हम मरिया जइरिया हे ।" ²⁶उने उणकासे क्यो ,हे कम-बिसासीहुंण ,तम कायसरु इतरा डरिया होया हो ?"तो उठिके उने समन्दर के ललकारियो,अने सगळो सांत हुइग्यो । ²⁷अने वी अचरज करिके केवा लाग्या,"यो कसो मनख ,के बगोळियो अने समन्दर बी उको हुकम माने ? " ²⁸अने जदे उ दुसरा आड़ी गदरेनियो का इलाका माय पोंच्यो,तो दो मनख जिणकामे बुरी आतमाहुंण थी कबर से हिटीके उकासे मिळ्या,वी इतरा खतरनाक था के कोई बी उना मारग से नी हिटी सकता था । ²⁹अने देखोतो, उणने चिल्लईके क्यो , "हे परमेसर का बेटा ,हमारे थारसे कंई काम ? कंई तु यां हमारे दुःख देवा आयो हे ?" ³⁰थोड़ाक दुरा पे नरा सुवळाहुंण को टोळो चरीरियो थो । ³¹बुरी आतमाहुंण उकासे या कंई के बिणती करवा लागी ,अगर तु हमारे निकाळणो चावे तो हमारे सुवळाहुंण का टोळा माय मोकली दे ।" ³²उने उणकासे क्यो , "जाव !"अने वी हिटी के सुवळाहुंण माय भरईग्यी ,अने देखो ,उ अखो टोळो जोरसे कराड़ा पे जई समन्दर माय पड़िग्यो अने डुबी मरियो । ³³ग्वाळा भागिके नगर माय ग्या ने बुरी आतमा से भरिया मनखहुंण पे कंई बित्यो थो ने एका साते-साते अखो हाल कई सुणायो । ³⁴अने देखोतो ,अखा नगर का लोग हिटीके इसु से

मिळवा आया ,अने जदे उणने उके देख्यो ,तो उकसे बिणती करी के हमारा इलाका से बायरे हिटी जा ।

9 ¹उ नाव पे बेठ्यो ,अने पार उत्तरिके अपणा नगर माय आयो । ²अने देखो,थोड़ाक लोग एक लकवा का मारिया होया के खाट पे लाखी के उका कने ल्याया । इसु ने उणको बिसास देखिके उना लकवा का बेमार से क्यो,"म्हारा बेटा,हिम्मत राख,थारा पाप मांफ होया।" ³अने देखो, सास्तरीहुंण माय से थोड़ाक माय-माय केवा लाग्या , "यो तो परमेसर की बुरई करे । ⁴इसु ने उणका हिरदा का बिचार जाणीके क्यो,"तम अपणा मनहुंण माय बुरो कायलेणे चितो हो ? ⁵सुदो कई हे ? यो केणो , ' थारा पाप माफ होया ,के यो,' उठ्या अने चल्यो फिर ?" ⁶पण इकासरु के तम जाणी लो के मनख का बेटा के धरती पे पाप माफ करवा को हक हे -"उठ्या, अपणी खाट उठाइ अने घरे जा ।" ⁷उ उठिके अपणा घरे चल्योग्यो । ⁸जदे भीड़ (हुजुम)ने यो देख्यो तो वी डरिग्या अने वी परमेसर की बड़ई करवा लाग्या जेने मनखहुंण के असो हक यो । ⁹जसेज इसु वां से अगड़े बड़ियो उने मत्ती नाम का एक मनख के चुंगी नाका माय बेठ्यो देख्यो,अने उने उकासे क्यो, "म्हारा पाछे हुइजा !"उ उठ्यो अने उका पछड़े चली पड़ियो । ¹⁰फेर असो होयो के जदे उ घर माय जिमवा बेठ्यो ,देखो नरा नाका वसुलवा वाळा अने पापी अइके इसु अने उका चेलाहुंण का साते जिमवा बेठिग्या । ¹¹अने जदे फरीसीहुंण ने यो देख्यो तो उका चेलाहुंण से क्यो,"तमारो गरु नाकावसुळवा वाळा अने पापिहुंण साते कायसरु खाय ?" ¹²पण जदे उने यो सुण्यो तो क्यो , "अच्छा-भला के बैद (डाक्टर-अग्रेजी शब्द Doctor का बिगड़ा रूप) की जरुवत हयनी , पण मांदाहुंण के होय । ¹³पण जाव अने इको अरथ जाणो : हुं बलिदान नी पण दया चउं । क्योके हुं धरमिहुंण के नी पण पापीहुंण के तेड़वा आयो हुं ।" ¹⁴तो योहन का चेला उका कने अइके केवा लाग्या , "कई वजा हे के हम अने फरीसी तो बरत (उपास) राखे , पण थारा चेला बरत नी राखे ?" ¹⁵इसु ने उणकासे क्यो , "जत्तक लाड़ो बरातियाहुंण का साते रे,कई वी दुःख मनाई सके हे ? पण वी दन आवेगा जदे लाड़ो उणकासे एकाड़ी करियो जायगा अने जदे वी उपास राखेगा । ¹⁶जूना लतरा पे नवा लतरा को थेगळो कोई नी लगाड़े ,क्योके थेगळो उना लतरा के खेची ले हे, अने उ पेलां से बी घणो फाटी जाय हे । ¹⁷नीज वी लोग जूनी मसकहुंण माय नवो अंगुर रस भरे ,क्योके असो करवा से मसकहुंण फाटी जाय अने

अंगुर रस बी जाय अने मसकहुंण खराब हुई जाये;पण नवो अंगुर रस नवी मसकहुंण माय भरे हे अने दोईज बणी रे ।" ¹⁸ जदे उ उणकासे या बात करिज रियो थो तो इतरा माय पराथनाघर को एक हाकिम अईके उके परणाम करिके केवा लाग्यो , "म्हारी नानी अभी हाल मरी हे ,पण चलीके अपणो हात उकापे राख वा जिन्दी हुई जायगा ।" ¹⁹ इसु उठ्यो अने इका पछड़े चली पड़ियो अने उका चेलाहुंण ने बी असोज करियो । ²⁰ अने देखोतो, एक बंईरा जिके बारा बरस से लोई बिवा कि बेमारी थी उका पछड़े अईके उका चोगा का किनारा के हात लगाड़ी द्यो ; ²¹ क्योके वा अपणा हिरदा माय बिचारती थी ,अगर हुं उका लतरा केज हात लगाड़ी लुंवा तो अच्छी हुई जउंवा ।" ²² इसु ने पलटी के उके देख्यो अने क्यो , "हिम्मत राख थारा बिसास ने थारे अच्छो करियो ।" वा बंईरा उनी घड़ी अच्छी हुइग्यी । ²³ जदे इसु उना हाकिम का घरे पोंच्यो तो उने बंसी बजावा वाळाहुंण अने भीड़ को मजमो देख्यो । ²⁴ उने उणकासे क्यो , "चल्या जाव क्योके नानी मरी हयनी पण सोईरी हे ।" इ पे वी उकी मजाक बणावा लाग्या । ²⁵ पण जदे लोगहुंण के बायरे हेड़ी लाख्या ,तो इसु भीतरे ग्यो अने उने हात पकड़ीके नानी के उठाड़ी, अने नानी उठिके बेठिग्यी । ²⁶ यो समिचार उना अखा इलाका माय फेलीग्यो । ²⁷ जदे इसु वां से अगड़े बड़ियो तो दो आंधा उका पछड़े यो चिल्लाता अने तेइता होया चल्या , " हे दाउद की सन्तान ,हमार पे दया करजे !" ²⁸ अने जदे उ घर माय जइ चुक्यो तो वी आंधा उका कने आया । इसु ने उणकासे क्यो,कई तम बिसास करो के हुं यो करी सकुं ?" उणने उकासे क्यो , " हाँ परभु ।" ²⁹ तो उने या कईके उणकी आंखहुंण के हात लगाड़ियो, "तमारा बिसास मुजब तमारा सरु हुई जाय ।" ³⁰ अने उणकी आंखहुंण खुलिग्यी । इसु ने उणके काठी चितावणी देतो होयो उणकासे क्यो, " देखो , यो कोई के मती बताइजो ।" ³¹ पण उणने जईके अखा इलाका माय उकी चरचा करी । ³² जदे उ बायरे जई रियो थो ,तो एक गुंगा के ,जो बुरी आतमा से भरियो थो ,इसु कने लाया । ³³ अने जदे बुरी आतमा हेड़ि लाखी , तो गुंगो बोलवा लाग्यो । इ पे भीड़ अचम्भो करिके केवा लागी , " इसराइल माय असो कदी नी देख्यो ।" ³⁴ पण फरीसी केवा लाग्या , "उ तो बुरी आतमाहुंण का सरदार की मदद से बुरी आतमाहुंण के हेड़े हे ।" ³⁵ इसु सगळा नगर अने गामहुंण माय जईके, उणका पराथनाघरहुंण माय परबचण देतो अने (सरग) राज को सुब समिचार को परचार करतो अने नरा तरां की बेमारी ने हरतरां की कमजोरी के अच्छो करतो रियो । ³⁶ अने लोगहुंण का हुजुम के देखीके उके उण पे तरस आयो ,क्योके वी उनी गाडरहुंण सरिका दुःखी अने उदास था जिणको कोई ग्वाळो नी होय । ³⁷ तो उने अपणा चेलाहुंण से क्यो, " फसल तो

नरी हे ,पण मजुरिया थोड़ाक हे । ³⁸इकासरु फसल का मालेख से बिणती करो के उ फसल काटवा सरु मजुरिया मोकले । "

10 ¹तो इसु ने अपना बारा चेलाहुंण के बुलईके उणके बुरी आतमाहुंण पे हक द्यो के उणके हेड़े अने सगळी तरां की बेमारी ने सगळी तरां की कमजोरी के अच्छो करे । ²अबे बारा परेरितहुंण को नाम यो हे: पेलो ,सिमोन ,जो पतरस केवाय, अने उको भई अब्दियास ; जब्दी को बेटो याकुब अने उको भई योहन ; ³फिलिप्पुस ,बरतुल्मे, थोमो अने नाको वसुलवा वाळो मती ; हल्फे को बेटो याकुब अने तद्दे ; ⁴सिमोन कनानी अने यहूदा इस्कारयोती, जेने उके पकड़वई लाख्यो । ⁵इना बाराहुंण के इसु ने यो कईके मोकलिया ;गेरजातहुंण कने मती जाजो,अने नी सामरिहुंण का कसाज नगर माय जावजो । ⁶इका बजाय इसराएल का घराणा कीज खोई होई गाडरहुंण (लोग) कने जाजो । ⁷अने जाता होया तम यो परचार करिके कोजो , 'सरग को राज कने अईग्यो ।' ⁸बेमारहुंण के अच्छा करो ,मरिया होया के जिवाड़ो,कोड़ियाहुंण के सुध्द करो ,बुरी आतमाहुंण के हेड़ो । तमारे फिरी मिळयो फिरी माय दो । ⁹अपणी कमर की अंटी माय नी सुन्नो ,नी चाँदी अने नी तांबो राखजो । ¹⁰जात्रा सरु नी झोळो ,यांतोड़ी के दो कुड़ता बी नी ,नी जुता अने नी लाकड़ी राखो , क्योके मजुर के जिमवा को हक हे । ¹¹जेना कसा नगर या गाम माय जाव तो पुछी- ताछी लो के वा कुंण लायक हे अने बिदा होवा तोड़ि वांज रो । ¹²जदे तम उना घर माय जाव तो सान्ती को आसीरबाद दो । ¹³अगर उ घर लायक होयगा तो तमारी सान्ती उना घर माय बणी रेगा ,पण अगर नी हे तो सान्ती को तमारो परणाम तमारा कने अई जायगा । ¹⁴जो तमारे माने हयनी अने तमारी बातहुंण पे कान नी धरे, जदे तम उना घर ने नगर से हिटो ,तो अपना पगहुंण को धुळो झाटकी लाखजो । ¹⁵हुं तमार से साँची कू के न्याव का दन उना नगर का बजाय सदोम अने अमोरा देस को हाल जादा सेणे लायक होयगा । ¹⁶देखोतो, हुं तमारे गाडराहुंण सरिका बरगड़ाहुंण माय मोकलुं । इकासरु सरप सरिका चातरिया अने कबुतर सरेका भोळा बणो । ¹⁷पण मनखहुंण से होसियार रिजो, क्योके वी तमारे कचेरीहुंण माय देगा अने अपना पराथनाघरहुंण माय तमारे कोड़ा मारेगा । ¹⁸तम म्हारा सरु राजपालहुंण अने राजाहुंण सामे उबा करिया जावगा के उणकापे अने गेरजात सरु गवा बणो । ¹⁹पण जदे वी तमारे पकड़ाय तो फिकर मती करजो के हम कई अने कसे कांगा ,क्योके जो कई तमारे केणो हे उनी घड़ी तमारे बतई द्यो जायगा । ²⁰क्योके बोलवा वाळा

तम नी ,पण यो तमारा पिता को आतमो जो तमारा माय बोले । ²¹ भई अपणा भई के अने बाप अपणा छोरा के मारी लाखवा सरु देगा , 'अने ओलाद अपणा मां बाप का बिरोध माय उबा हुईके उनके मरवई लाखेगा ।' ²² म्हारा नाम सरु सगळा तमार से घिरणा करेगा , पण जो आखर तोड़ी धीरज धरेगा उको उद्धार होयगा । ²³ जद कदी वी तमारे इना नगर माय सताड़े तो दुसरा माय भागी जाजो ,क्योके हुं तमार से साँची कुं के इका पैला के तम इसराइलहुंण का सगळा नगरहुंण माय फिरनो खतम करो , के मनख को बेटो अई जायगा । ²⁴ नी चेलो अपणा गरु से मोटो अने नी नोकर अपणा मालेख से मोटो होय । ²⁵ चेलो अपणा गरु सरिको अने नोकर अपणा मालेख सरिको हुई जाय योज नरो । अगर उणने घर का मालेख के सेतान क्यो तो घर का मनखहुंण के कजा कंई-कंई केगा ! ²⁶ इकासरु उणकासे मति डरो ,क्योके कंई ढांक्यो हयनी जिके उघाड़ियो नी जायगा अने कंई छिप्यो हयनी जिके जाण्यो नी जायगा । ²⁷ जो हुं तमार से इन्दारा माय कूं उके तम उजाळा माय को अने जो कंई तम काने -कान सुणो ,उके डागला (मचान) पे चड़िके परचारो । ²⁸ उणकासे मति डरो जो काया के नास करे पण आतमा के नास नी करी सके पण उकासे डरो जो आतमा अने काया दोई के नरक माय नास करि सके । ²⁹ कंई एक पइसा माय दो चिरकली नी बिके ? फेर बी तमारा पिता की मरजि का बिना एक बी धरती पे नी पड़ी सके । ³⁰ तमारा माथा का बाल बी गिण्या होया हे । ³¹ इकासरु डरो मति । तम नरी चरकलीहुंण से बी जादा मोल का हो । ³² तो हरेक जो मनक का सामे म्हारे मानिले, हुं बी अपणा पिता का सामे ,जो सरग माय हे ,मानी लुंवा । ³³ पण जो मनखहुंण का सामे म्हारे नी माने , हुं बी उके अपणा पिता का सामे ,जो सरग माय हे नी मानुवां । ³⁴ "या मति सोचो के हूं धरती पे मेळ-मिळाप करावा आयो । हुं मेल करावा नी ,पण तरवार चलवाणे आयो । ³⁵ हुं तो इकासरु आयो के छोरा के उका बाप ,छोरी के उकी मेतारी ,अने लाड़ी के उकी सासु का बिरोधी करी दूं ; ³⁶ अने मनख का बेरी उकाज घर का लोग होयगा । ³⁷ जो म्हार से जादा अपणा मां ने बाप से परेम राखे ,उ म्हारा लायक हयनी । जो म्हार से जादा अपणा छोरा ने छोरी से परेम राखे ,उ म्हारा लायक हयनी, ³⁸ अने जो अपणो कुरुस उठईके म्हारा पाछे नी चले , उ म्हारा लायक हयनी । ³⁹ जो अपणो पराण बचाड़े ,उ उके खोवेगा ,अने जो म्हारा सरु अपणो पराण खोवे उ उके पावेगा । ⁴⁰ जो तमारे माने उ म्हारे माने, अने जो म्हारे माने ,उ म्हारा मोकलवा वाळा के माने । ⁴¹ जो नबी के नबी जाणी के माने उ नबी को फळ पावेगा,अने जो धरमी के धरमीजण जाणीके मानी ले उ धरमी को फळ पावेगा । ⁴² जो इना छोटहुंण माय से कोइं

एक के चेलो जाणीके एक ठंडो गिलास पाणी बी पीवासरु दे तो हुं तमार से साँची कूं के उ अपणो फल कदीज नी खोवेगा ।"

11 ¹असो होयो के जदे इसु चेलाहुंण के समझई चुक्यो,तो वां से उ उणका नगरहुंण माय सिक्छा देवा अने परचार करवा चलयोग्यो । ²जदे जेळखाना माय योहन ने मसीह का कामहुंण की चरचा सुणी तो अपणा चेलाहुंण के उका कने यो पुछवा मोकलिया , ³"कंई आवा वाळो तु ज हे ,के हम कोई दुसरा की बाट जोवां?" ⁴इसु ने उणके जवाब द्यो , "जो कंई तम सुणो अने देखो हो जईके उको समिचार योहन के दइदो; ⁵आंधा देखिरिया , पांगळा चलिरिया, कोड़िया अच्छा हुइरिया,अने बेरा सुणे,मुरदाहुंण जिवाड़िया जाय अने गरीब-गुरबाहुंण के सुब समिचार सुणायो जईरियो हे । ⁶अने धन हे जो म्हारी वजा से ठोकर खावा से बचिया रे । ⁷उणका जाता बखत इसु भीड़ का लोगहुंण से केवा लाग्यो ,तम माळ माय कंइ देखवा गया था ? बायरा से हलता होया सरकन्डा (एक प्रकार की घास जो नदी किनारे होती हे) के ? ⁸फेर तम कंई देखवा गया था ? नरम लतरा परिया होया मनख के ? देखोतो , नरम लतरा पेरवा वाळा राजमेल माय रे हे । ⁹फेर तम कायसरु गया था ? कंइका नबी के देखवा सरु ? हां ,अने हुं तमार से कूं नबी से बी मोटा मनख के । ¹⁰यो उज हे जिका बारा माय लिक्ख्यो हे, देख, हुं थारा अगड़े अपणा दुत के मोकलुं, जो थारो मारग थारा अगड़े तियार करेगा । ¹¹हुं तमार से साँची कूं के बंइराहुंण से जनमिया होया माय योहन बसिस्मा देवा वाळा से मोटो कोइंज नी होयो, फेर बी जो सरग का राज माय नानो से नानो हे , उ उकासे मोटो हे । ¹²योहन बसिस्मा देवावाळा का दन से लिके अब तोड़ी सरग का राज माय जबरजस्ती परवेस होतो रियो अने ताकतवाळो मनख उ पे हक जमातो रे हे । ¹³क्योके सगळा नबी अने नेम ,योहन के आवा की अगमबाणी करता रिया हे । ¹⁴अगर तम एनी बात के माननो चाव तो योज एलियो हे ,जो आवा वाळो थो । ¹⁵जिणका सुणवा का कान होय उ सुणीले । ¹⁶हुं एनी पीड़ी को मिलाण किकासे करु ? इ लोग हाट-बजार माय बेठवा वाळा बाळकहुंण सरिका ,जो दुसरा बाळकहुंण के तेड़े, ¹⁷अने के,हमने तमारा सरु बंसी बजाड़ी ,पण तम नाच्या हयनी : अने हमने दुःख भरिया गीत गाया पण तमने दुःख नी मनायो । ¹⁸क्योके योहन नी तो खातो अने नी पीतो आयो,पण वी के ,उकामे बुरी आतमा हे । ¹⁹मनख को बेटो खातो-पीतो आयो अने वी के देखोतो,पेटु अने पियक्कड़,चुंगी लेवा

वाळाहुंण को दोस! फेर बी बुद्धि अपणा कामहुंण से सिध्द होय है ।" ²⁰ तो उ उना नगरहुंण के जिकामे नरा अचरज का काम करिया था , उळाणो देवा लाग्यो क्योके उणने पस्ताप नी करियो थो । ²¹ " हे खुराजीन ,धिक्कार हे थारपे ! हे बेतसदा ,धिक्कार हे थारपे ! क्योके जो अचरज का काम तमारा माय करिया गया ,अगर वी सुर अने सेदा माय करिया जाता तो वी नरा पेंला टाट ओड़िके अने राखोड़ा पे बेठी के पस्तावो करि लेता । ²² फेर बी हुं तमार से कूं के न्याव का दन सुर अने सेदा की हालत तमारा बजाय जादा सेणे सरिकी होयगा । ²³ अने हे कफरनहुम,कई तु सरग तोड़ी अदरे उठाड़ियो जायगा ? तु अधोलोक(पाताल)तोड़ी उतरेगा, क्योके जो अचरज का काम थारा माय करिया गया ,अगर वी सदोम माय करिया जाता ,तो उ आज तोड़ी बण्यो रेतो । ²⁴ फेर बी हुं थार से कूं , न्याव का का दन थारी हालत का बजाय सदोम की हालत जादा सेणे सरिकी होयगा ।" ²⁵ उनी बखत इसु ने क्यो , " हे पिता ,सरग अने धरती का परभु, हुं थारे भजुं (स्तुति) , के तने इ बातहुंण जानी अने बुद्धिमानहुंण से छिपाड़ी के राखी अने बाळकहुंण पे परगटी है । ²⁶ हां, पिता, क्योके थारे योज अच्छो लाग्यो । ²⁷ म्हारा पिता ने म्हारे सगळो कई समळायो । पिता का अलावा बेटा के कोइनी जाणे , या उज जिकापे परगटणो चावे । ²⁸ हे सगळा थक्या अने बजन से दब्या लोगहुंण म्हारा कने आव हुं तमारे अराम दुंवा । ²⁹ म्हारो जुड़ो अपणा अदरे उठई लो अने म्हारसे सिको , क्योके हुं नरम अने हिरदा माय दीन हुं अने तम अपणा हिरदा माय अराम पावगा । ³⁰ क्योके म्हारो जुड़ो सबगो अने म्हारो बजन हळको है ।"

12 ¹ तो इसु सबद् का दन खेतहुंण माय से हुड़के हिट्यो ; उका चलाहुंण के भुक लागी अने वी उंबी तोड़ी- तोड़ी के खावा लाग्या । ² पण जदे फरीसीहुंण ने यो देख्यो तो उकासे क्यो," देखतो , थारा चेला उ काम करिरिया है जिके सबत् का दन करणो ठीक हयनी । ³ इ पे उने उणकासे क्यो , " कई तमने नी बांच्यो के जदे दाउद अने उका साथिहुंण के भुक लागी तो उने कई करियो ? ⁴ उने तो परमेसर का मन्दर माय जईके अरपण का रोटहुंण खाया ,जिणके खाणो नी तो उका सरु अने नी उका साथिहुंण सरु पण सिरप याजकहुंण सरु ठीक थो । ⁵ या कई तमने नेम माय नी बांच्यो के याजक सबद् का दन मन्दर माय सबद् की रीत के तोड़े है ,फेर बी निरदोस रे ? ⁶ पण हुं तमार से कूं के यां उ हे जो मन्दर से बी बड़िके । ⁷ अगर तम इको अरथ समझता , हुं दया चव हुं बलिदान नी, तो निरदोस के दोसी नी ठेराता । ⁸ क्योके मनख को बेटो

सबद् का दन को बी परभु हे ।" ⁹वां से हिटी के उ उणका पराथनाघर माय ग्यो । ¹⁰देखो वां एक सुक्या हात को मनख थो । उणने इसु पे दोस लगावा की मन्सा से यो केता होया सवाल करियो,"कंई सबद् का दन अच्छो करनो ठीक हे ? " ¹¹उने उणकासे क्यो ,तमारा माय असो कुंण हे ,जेकी एक गाडर होय,अने वा सबद् का दन खाड़ा माय पड़ी जाय तो उ उके पकड़ी के बायरे नी हेड़े ? ¹²तो एक मनख को मोल, गाडर से कितरो बड़ी के हे ! इकासरु सबद् का दन भलो करनो ठीक हे ।" ¹³तो उने उना मनख से क्यो,अपणो हात बड़ा !" उने बड़ायो,अने उ दुसरा हात सरिको अच्छो हुईग्यो । ¹⁴तो फरीसी बायरे हिट्या अने उका बिरोध मे सगळा की राय लईके के उके कसे नास करां । ¹⁵पण इसु यो जाणीके वां से हिटीग्यो । नरा लोग उका पाछे चली पड़िया ,अने उने सगळा के अच्छा करिया , ¹⁶अने उणके चेतायो के म्हारे नी परगटे , ¹⁷जिकासे के नबी से जो क्यो ग्यो थो , उ पुरण होय; ¹⁸देखो ,म्हारो दास जिके म्हने छांट्यो ,म्हारो परेमिलो जिकासे म्हारो हिरदो घणो खुस हे । हुं उ पे अपणो आतमो रेडुवां अने उ गेरजात (गेरयहुदी) पे ठीक न्याव को समिचार देगा । ¹⁹उ नी तो झगड़ो करेगा अने नी चिल्लायगा ,अने नी कोई उकी अवाज सेरी माय सुणेगा । ²⁰उ कुच्या होया सरकन्डा के नी भांगेगा अने धुँओ देती बाती के नी बुजाड़ेगा ,जत्तक के न्याव के नी जिताड़े । ²¹अने उकाज नाम से गेरजात आसा धरेगा ।" ²²इसु कने बुरी आतमा(बायरे की हवा) से भरिया मनख के लाया जो आंधो अने गुंगो थो ,अने उने उके अच्छो करियो,उ गुंगो बोलवा अने देकवा लाग्यो । ²³इ पे अखी भीड़ अचरज करिके केवा लागी , "कंई यो मनख दाउद कि सन्तान हुई सके ?" ²⁴पण जदे फरीसीहुंण ने यो सुण्यो तो क्यो , " यो मनख बुरी आतमाहुंण के सिरप उणका सरदार बालजबूल की मदद से हेड़े हे ।" ²⁵उणका बिचार जाणि के उने क्यो ,जिका राज माय फुट (भरई जाय)पड़िजाय उ नास हुई जाय हे ,अने जेना नगर या घर माय फुट पड़िजाय उ बण्यो नी रेगा , ²⁶अने अगर सेतानज सेतान के हेड़े तो उ अपणो बिरोधी हुईग्यो हे -फेर उको राज कसे बण्यो रेगा ? ²⁷फेर अगर हुं बालजबूल कि मदद से बुरी आतमाहुंण के हेड़ु तो तमारा बेटा केकी मदद से हेड़े हे ? इकासरु वीज तमारो न्याव करेगा । ²⁸पण अगर हुं परमेसर का आतमा से बुरी आतमाहुंण के हेड़ु ,तो परमेसर को राज तमारा माय अई पोंच्यो । ²⁹या कोई ताकतवर मनख का घर माय भरई के कोई उकी सम्पती कसे उठई ली जाय जत्तक के उ पेलां उना ताकतवर के बांधी नी लाखे । जेका बाद उ उको घर लूटेगा । ³⁰जो म्हारा साते हयनी ,उ म्हारो बिरोधी ; अने जो म्हारा साते नी भेळो करे ,उ

बेरे हे । ³¹इकासरु हुं तमार से कूं ,मनख का हर पाप अने निन्दा माफ करिया जायगा ,पण पवितर आतमा की निन्दा नी माफ करी जायगा । ³²अने जो कोई मनख का बेटा का बिरोध मे कोई बात केगा उको यो कसूर माफ करियो जायगा ,पण जो कोई पवितर आतमा का बिरोध मे कंई केगा ,उको यो कसूर नी तो एना युग अने नी आवा वाळा युग मे माफ करिया जायगा । ³³या तो झाड़ के अच्छो को अने फळ के बी ,या झाड़ के निकम्मो को अने उका फळ के बी ,क्योके झाड़ अपना फळ सेज पेचाणियो जाय हे । ³⁴हे सरप का कणाहुंण ,तम बुरा होता होया अच्छी बातहुंण कसे कई सको हो ? क्योके जो हिरदा माय भरियो होय ,उज मुण्डापे आय हे । ³⁵भलो मनख अपना भला भन्डार से भली बातहुंण हेड़े हे ; अने बुरो मनख अपना बुरा भन्डार से बुरीबाहुंण हेड़े हे । ³⁶हुं तमार से कूं ,जो बी बुरी बात मनख केगा ,न्याव का दन वी उको लेखो देगा । ³⁷क्योके तु अपना सबदहुंण से निरदोस अने अपना सबदहुंण सेज दोसी ठेराड़ियो जायगा । ³⁸तो थोड़ाक सासतरी अने फरीसीहुंण ने उकासे क्यो,"गरु ,हम थारसे कोई सेणानी देखवा चावां ।" ³⁹पण उने ज्वाब द्यो,"या बुरी अने ब्योबिचारिणी पीड़ी सेनाणी देखवा कि इच्छामे रे, फेर बी योना नबी की सेनाणी का अलावा कोई सेनाणी नी दी जायगा , ⁴⁰क्योके जसो योना तीन दन अने तीन रात बड़ी मच्छी का पेट माय रियो,उनी तरां मनख को बेटो बी तीन दन अने तीन रात धरती का गरभ माय रेगा । ⁴¹न्याव का दन नीनवा का लोग इनी पीड़ी का लोगहुंण का साते उठ्यायगा अने उणके दोसी ठेरायगा, क्योके उणने योना को परचार सुणिके पस्तावो करियो ;अने देखो यां उ हे जो योना से बी बड़िके हे । ⁴²न्याव का दन दक्खण की राणी इनी पीड़ी का लोगहुंण का साते उठ्यायगा अने उणके दोसी ठेरायगा, क्योके वा सुलेमान को ज्ञान सुणवा सरु धरती का कनारा से अई । देखो यां उ हे जो सुलेमान से बी बड़िके हे । ⁴³जदे बुरी आतमा कोई मनख माय से हिटे , तो अराम दुडवा सरु सुकी जगा पे भटक्या-फिरे , पण नी पाय । ⁴⁴तो वा के ,'जेना घर से हुं अई थी उनाज घरे पाछी चली जउंवा ,'अने जदे वा पाछी आय तो उके रितो, संजवारा से सोरियो ,अने सज्यो-सजायो पाय । ⁴⁵तो वा जईके अपना से जादा बुरी आतमाहुंण के लियाय अने वी घुसीके वां रेवा लागे; अने उना मनख को पाछलियो हाल पेलां से बी बुरो हुई जाय । इनी पीड़ी का लोगहुंण का साते बी असोज होयगा ।" ⁴⁶जदे उ भीड़ से बात-चित करिरियो थो ,तो देखो, उकी मेतारी अने उका भई बायरे उब्बा था अने उकासे बात करणो चाता था । ⁴⁷अने कोईने इसु से क्यो," देखतो ,थारी मेतारी अने थारा भई बायरे उब्बा अने थार से बात-चित करणो चावे ।" ⁴⁸पण उना केवा वाळा के ज्वाब

देतो होयो उने क्यो," कुंण म्हारी मेतारी अने कुंण म्हारा भई ?" ⁴⁹ अने अपणा चेलाहुंण आड़ी हात बड़ईके उने क्यो , "देखो ,म्हारी मेतारी अने म्हारा भई ! ⁵⁰ क्योके जो कोई म्हारा पिता की जो सरग माय हे मरजी पुरण करे ,उज म्हारो भई ,म्हारी बेन अने म्हारी मेतारी हे । "

13 ¹ उना दन इसु घर से बायरे हिटीके सरवर का कराड़ा जई बेठ्यो । ² अने उका एरे-मेरे एक बड़ी भीड़ भेली होई , तो उ नाव पे चड़ीके बेठिय्यो अने भीड़ कराड़ा पेज उबी री । ³ उने या केता होया उणकासे मिसाल माय नरी बातहुंण करी ;" देखो, एक बोणे वाळो बीज बोवा हिट्यो । ⁴ बोता बखत ' थोड़ाक बीज मारग का मेरे पड़िया अने चिरकलीहुंण ने अईके उणके चुगिल्या । ⁵ थोड़ाक भाटाळी जमीन पे पड़िया जां उणके जादा गारो नी मिळ्यो ;अने उन्डो गारो नी मिळवा की वजा से वी झट उग्याया । ⁶ पण सूरज उगवा पे वी झुलसई ग्या अने जड़ नी पकड़वा की वजा सुखई ग्या । ⁷ अने दुसरा बीज कांटाळी झांडीहुंण माय पड़िया अने झांडीहुंण ने बड़िके उनके दाबी लाख्या । ⁸ पण थोड़ाक बीज अच्छी जमीन पे पड़िया अने फळिया ,कोई सो गुणा ,कोई साट गुणा ,अने कोई तीस गुणा । ⁹ जिका कने कान हे उ सुणिले ।" ¹⁰ चेलाहुंण ने अईके उकासे क्यो,"तु कायसरु उणसे मिसालहुंण माय बात करे ?" ¹¹ उने उणके ज्वाब द्यो,"तमारे यो दयो ग्यो के सरग का राज का भेदहुंण के जाणों ,पण उणके नी । ¹² क्योके जिका कने हे उके हजु बी द्यो जायगा ,अने उका कने नरोगंज हुई जायगा ;पण जिका कने हयनी ,उकासे उ बी जो उका कने हे लई लियो जायगा । ¹³ इकासरु हुं उणकासे मिसालहुंण माय बात करूं, क्योके वी देखता होया बी नी देखी सके अने सुनता होया बी नी सुणी सके ,अने नीज वी समझे हे । ¹⁴ अने उणका बारामें यसायाह की या अगमबाणी पुरण होती जईरी हे याने,' तम सुणता तो रोगा पण समझोगा हयनी; अने देखता तो रोगा, पण तमारे सूजेगा नी ; ¹⁵ क्योके इनी जात को हिरदो जाड़ो हुईग्यो,अने अपणा कानहुंण से लोग मुस्किल से सुणे, अने उणने आँखहुंण मिची लाखी कई असो नी होय के वी अपणी आँखहुंण से देखे अने कानहुंण से सुणे ,अने हिरदा से समझीले अने बदलाव अई जाय ,अने हुं उणके अच्छो करूं ।" ¹⁶ पण धन हे तमारी आँखहुंण क्योके वी देखे,अने तमारा कानहुंण के वी सुणे । ¹⁷ क्योके हुं तमार से साँची कू के नरा नबीहुंण अने धरमीमनखहुंण ने चायो के जो तम देखिरिया हो उके देखे,पण नी देख्यो ;अने जो तम

सुणिरिया हो सुने पण नी सुण्यो । ¹⁸अबे बोणे वाळा की मिसाल के (को अरथ) सुणो : ¹⁹जदे कोइ मनख राज को बचण सुणाय अने उके समझे हयनी तो उ सेतान अईके ,जो कंई उका हिरदा माय बोयो ग्यो थो,छुड़ई लई जाय । या मारग का कनारा की वा जमीन जिपे बीज बोयो ग्यो थो । ²⁰अने भाटाळी जमीन जिकापे बीज बोयो ग्यो थो ,यो उ मनख जो बचन सुणे अने झट खुसीसे मानी ले , ²¹फेर बी अपणा माय जड़ नी राखे इकासरु थोड़ाक बखत को रे,अने जदे बचण का वजा से संकट ने सतावड़ो आवे तो उ झट ठोकर खावे हे । ²²अने कांटाळी झान्डी माय बोयो ग्यो , उ मनख जो बचन सुणे अने जगत की चिन्ता अने धन को धोको बचण के दाबी लाखे अने उ बिना फळ को हुई जाय । ²³अच्छी जमीन माय बोयो ग्यो ,उ मनख जो बचन सुणिके अने समझिके सईमें फळ लाय , कोई सो गुणो, कोई साट गुणो, कोई तीस गुणो ।" ²⁴उने एक हजु मिसाल दई क्यो , "सरग का राज को मिलाण उना मनख से करियो जई सके जिने अपणा खेत माय अच्छो बीज बोयो । ²⁵पण जदे लोग सोईरिया था,तो उको दुस्मन आयो अने गँउ का माय माळबीज बोईके चल्यो ग्यो । ²⁶पण जदे बीज माय अंकुरिया फुटिया अने फेर उंबी अई तो माळघास बी नजर आयो । ²⁷तो नोकरहुंण ने अईके मालेख से क्यो,' हे मालेख ,कंई तने अपनी जमीन माय अच्छो बीज नी बोयो थो ? फेर उमें माळघास कय्यांडी से अई ?' ²⁸अने उने उणकासे क्यो , 'यो कोई दुस्मन को काम हे !'नोकरहुंण ने उकासे क्यो,'कंई तु चावे के हम जईके उणके भेळा करि ला ? ' ²⁹पण उने क्यो , ' नी, असो नी होय के माळघांस भेळा करता बखत कंई तम उका साते गँउ बी नी उखाड़ी लाखो । ³⁰फसल काटवा तोड़ी दोई के एक साते बड़वा दो ,अने फसल काटवा का बखत हुं काटवा वाळाहुंण से कूवा , "पैला माळघास भेळो करिके बाळवा सरु भारा बान्दी लो ,पण गँउ के म्हारा खळा माय भेळा करो" ।" ³¹उने एक हजु मिसाल दई उणकासे क्यो,"सरग को राज रंई का दाणा सरिको हे जिके एक मनख ने लईके अपणा खेत माय बोई द्यो । ³²यो दुसरा सगळा दाणाहुंण से नानो होय ,पण पुरो बड़िके बाग का सगळा रोपाहुंण से मोटो हुई जाय हे अने असो झाड़ बणी जाय के अस्मान का पखेरु अईके उकी डाळहुंण पे बसेरो करे ।" ³³उने एक हजु मिसाल उणकासे कई : " सरग को राज खमीर सरिको हे जिके एक बंडरा तीन पसेरी आटा माय तत्तक मिळाती री जत्तक आटो खमीर नी बणिग्यो ।" ³⁴इसु ने इ सगळी बातहुंण भीड़ से मिसाल माय कई,अने उ मिसाल का अलावा उनसे कंई नी केतो थो । ³⁵जिकासे के नबी से जो बचण क्यो ग्यो थो उ पुरण होय : " हुं मिसाल माय बोलवा सरु अपणो मुन्डो खोलुवां । हुं उणी बातहुंण के कूवां जो जगत का बणता बखत से गुप्त थी ।" ³⁶फेर उ भीड़ के छोड़िके घरे आयो । तो उका चेला उका कने अईके केवा

लाग्या , " खेत का माळघास की मिसाल हमारे समझाइ ।" ³⁷ उने ज्वाब द्यो , " जो अच्छो बीज बोय उ मनख को बेटो , ³⁸ खेत तो जगत हे । अच्छा बीज राज की सन्तान । अने माळ बीज सेतान की सन्तान, ³⁹ अने दुस्मन जिने उणके बोया उ सेतान हे । फसल काटणो इना युग को अन्त अने फसल काटवा वाळा सरगदुत हे । ⁴⁰ जस्तरां माळघास भेळा करिके लाय माय बाळी लाखे उनीज तरां युग का आखिर माय बी होयगा । ⁴¹ मनख को बेटो अपणा सरगदुत के मोकलेगा जो उका राज माय से सगळी ठोकर की वजा ने बुरा काम करवावाळाहुंण के भेळा करेगा । ⁴² अने उणके लाय की भट्टी माय लाखेगा । वां रोणो अने दांत पिसणो होयगा । ⁴³ जदे धरमी अपणा पिता का राज माय सुरज सरिका चलकेगा । जिका कान होय उ कान धरे । ⁴⁴ "सरग को राज खेत माय छिप्या होया धन सरिको हे,जिके कोई मनख ने पायो ने छिपई लाख्यो ,अने उकासरु खुस हुई के उने अपणो सगळो कंई बेची लाख्यो अने उना खेत के मोल लई लियो । ⁴⁵ "फेर सरग को राज साँचा मोतीहुंण के सोदवा वाळा एक ब्योपारी सरिको हे । ⁴⁶ जदे उके एक अनमोल मोती मिळ्यो तो उने जईके अपणो सगळो कंई बेची लाख्यो अने उना मोती मोल लई लियो । ⁴⁷ फेर सरग को राज उना बड़ा जाळ सरिको समन्दर माय लाख्यो जाय अने नरी तरां की मच्छीहुंण घेरी लाय । ⁴⁸ अने जदे जाळ भरई ग्यो तो लोग उके कराड़ा पे खेंची लाया अने उणने बेठिके अच्छी मच्छीहुंण के तो टोपलीहुंण माय भेळी करी पण खराब के फेंकी लाखी । ⁴⁹ इना युग का आखर माय असोज होयगा । सरगदुत अईके बुराहुंण के धरमीहुंण से इकाड़ी करेगा ,

⁵⁰ अने उणके लाय का भट्टा माय लाखेगा जां रोणो अने दांत पीसणो होयगा ।

⁵¹ "कंई तमारी समझ माय इ सगळी बातहुंण अई ग्यी ?" उणने उके ज्वाब द्यो , "हां ।" ⁵² अने उणने उकासे क्यो , "इकासरु हरेक सासतरी जो सरग का राज की सिक्छा पई चुक्यो ,उना गृहस्त सरिको जो अपणा भण्डारघर से नवी ने जूनी चीज हेड़े हे ।" ⁵³ अने असो होयो के जदे इसु इ सगळी मिसाल दई चुक्यो तो वां से चल्यो ग्यो । ⁵⁴ उ अपणा नगर माय आईके लोगहुंण के उणका पराथनाघर माय परबचण देवा लाग्यो ,अने वी चकित हुई के केवा लाग्या , "इना मनख के असो ज्ञान अने असी अचरजभरी सक्ती कां से पई ? ⁵⁵ कंई यो सुतार को बेटो हयनी ? कंई इकी मेतारी को नाम मरियम अने इका भईहुंण को नाम याकुब ,युसफ,समोन अने यहुदा हयनी ? ⁵⁶ अने कंई इकी सगळी बेनहुंण हमारा माय नी रे ? तो इना मनख के यो सगळो कां से मिळ्यो ?" ⁵⁷ अने उकी वजा से लोगहुंण के ठोकर लागी ,पण इसु ने उणकासे क्यो," अपणा नगर अने घरीज

माय नबी को मानपाड़े हे ।" ⁵⁸अने लोगहुंण का अबिसास की वजा उने वां सामर्त को जादा काम नी करियो ।

14 ¹उन बखत देस का चोथा हिस्सा का राजा हेरोदेस ने इसु कि चरचा सुणी , ²अने अपना दासहुंण से क्यो , "यो तो योहन बसिस्मो देवा वाळो हे । यो मरिया माय से जी उठ्यो हे ,इकासरु इ ताकतहुंण उका माय काम करिरी हे ।" ³क्योके हेरोदेस ने योहन के बन्धवई लाख्यो थो । उने अपनी घराळी हेरोदियास की वजा उके जेलखाणा माय लाख्यो थो । ⁴क्योके योहन उकासे क्या करतो थो के उके राखणो थारा सरु ठीक हयनी , ⁵अने जदकि उ उके मारी लाखणो चातो थो , फेर बी लोगहुंण से डरतो थो क्योके वी उके नबी मानता था । ⁶पण जदे हेरोदेस को जनम दन आयो तो हेरोदियास की छोरी (राजकुमारी) उत्सव माय नाची के हेरोदेस के खुस करी यो । ⁷इ पे सोगन खईके उने वर दयो के जो कंई तू मांगे, हूं दुवां । ⁸अने मेतारी का उकसाणे पे उने क्यो, "एक थाळी माय योहन बसिस्मो देवा वाळा को माथो म्हारे यांज दे ।" ⁹जदकि उके दुःख होयो ,फेर बी अपनी सोगन अने जिमवा बेठिया मेमानहुंण की वजा से ,राजा ने हुकम द्यो के द्यो जावे । ¹⁰उने कोइंके भेजिके जेलखाणा माय योहन को माथो कटवई लाख्यो । ¹¹अने उको माथो परात माय लायो ग्यो अने छोरी के दई द्यो जिके वा अपनी मेतारी कने लई गयी । ¹²फेर योहन का चेला अईके लोथ के लई गया अने उणने उके गाड़ी द्यो । पाछा जईके उणने इसु के समिचार दयो । ¹³जदे इसु ने यो सुण्यो ,तो उ वां से नाव पे एखलो चड़ीके कसी बिराण जगा आड़ी चल्यो ग्यो । या सुणिके भीड़ का लोग नगर-नगर से पगे पग उका पाछे चली पड़िया । ¹⁴जदे उ नाव से उतरियो तो उने एक घणी बड़ी भीड़ देखी अने लोगहुंण पे तरस आयो अने उणका बेमारहुंण के अच्छा करिया । ¹⁵जदे सांझ होई तो उका चेला कने अईके केवा लाग्या , "या सुनी जगा हे अने दन अस्तिग्यो; इकासरु भीड़ के बिदा कर के लोग गाम माय जई के अपना सरु भोजण मोल लई ले ।" ¹⁶पण इसु ने उणकासे क्यो , "उणके जावा की जरुवत हयनी :तमीज उणके खावा सरु दो ।" ¹⁷उणने उकासे क्यो, "हमारा कने सिरप पाँच रोट (मालवी में रोट पुर्लिंग है) अने दो मच्छीहुंण हे ।" ¹⁸उने क्यो , "उणके म्हारा कने लियाव ।" ¹⁹तो लोगहुंण के घास पे बेठाड़िके उने पाँच रोट अने दो मच्छीहुंण के लई अने सरग आड़ी देखिके आसिस मांगी अने रोट का बटका करि-करिके चेलाहुंण के दई अने चेलाहुंण ने लोगहुंण के बांटी । ²⁰सगळा खई के धापी गया । तब (फेर बी) उणने बच्या होया कोळियाहुंण से भरी बारा टोपलिहुंण उठाड़ी । ²¹अने खावा वाळाहुंण, बईरां ने

बाळकहुंण के छोड़िके आदमीहुंण की गिणती करीब पाँच हज्जार थी । ²² तो उने झट अपना चेलाहुंण के नाव पे चड़वा सरु मजबुर करिया के वी उकासे पेंला उना पार जाय, जदकी उ खुदज भीड़ के बिदा करवा लागो । ²³ भीड़ के बिदा करवा का बाद उ परबत पे एखलो पराथना करवा सरु चल्यो गयो । जदे सांझ होई तो उ वां एखलो थो । ²⁴ पण नाव कराड़ा से थोड़क कोस दूर लेर माय झकोलिया खईरी थी ,क्योके बायरो सामे को थो । ²⁵ अने उ रात का चोथा पेर (परोड़ा माय) सरवर पे चलतो होयो उ उणका कने आयो । ²⁶ जदे चेलाहुंण ने उके सरवर पे चलतो होयो देख्यो तो वी घबरई के केवा लाग्या , "यो तो कोई भुत हे ! " ²⁷ पण इसु ने झट उनकासे बात करी अने क्यो, " हिम्मत राखो ! हुं हे । डरो मति ! " ²⁸ तो पतरस ने उका से क्यो , "परभु अगर तुज हे तो म्हारे पाणी पे चलिके थारा कने आवा को हुकम दे । " ²⁹ उने क्यो, " चल्यो आ ! " अने पतरस नाव से उतरिके पाणी पे चलतो होयो इसु आड़ी बड़ियो । ³⁰ पण बायरा के दखिके उ डरिग्यो ,अने डुबवा लाग्यो तो चिल्लायो, " परभु म्हारे बचाड़ ! " ³¹ इसु ने झट अपणो हात बड़ईके उके थामी लियो अने क्यो, "हे कमबिसासी ,तने सक कायसरु करियो?" ³² अने जदे वी नाव पे चड़िग्या तो बायरो थमिग्यो । ³³ अने जो लोग नाव माय था उणने उके परणाम करियो अने क्यो, "तू निस्चितज परमेसर को बेटो हे ! " ³⁴ वी पेलां पार हुईके गन्नेसरत पोंच्या , ³⁵ वां का लोगहुंण ने जदे उके पिचाण्यो तो उणने एरे-मरे का इलाका माय समिचार मोकलिया, अने लोग बेमारहुंण के उका कने लाया । ³⁶ वी उकासे बिनती करवा लाग्या के उ उणके लतरा को कोर केज छईलेणे दे अने जितरा ने छया ,वी अच्छा हुईग्या ।

15 ¹ यरुसलेम से थोड़ाक फरीसी अने सासतरी इसु कने अईके केवा लाग्या , ² "थारा चेलाहुंण पुरखाहुंण की रित के कायसरु नी माने ? वी तो रोटा खाता बखत हात नी धोय । " ³ उने ज्वाब द्यो, " अपनी रीत सरु तम खुद परमेसर का हुकम को उलांगो कायसरु करो ? ⁴ क्योके परमेसर ने क्यो, 'अपणा पिता अने अपनी मेतारी मान राखो , 'अने जो अपना पिता अने मेतारी के बुरो के उ मारी लाख्यो जाय । ' ⁵ पण तम को हो के अगर कोई अपना पिता ने मेतारी से के, तमारे 'म्हारसे जो बी फायदो पोंची सकतो थो , उ परमेसर के दई चुक्या , ⁶ 'तो उके अपना पिता ने अपनी मेतारी को मान करवा की जरुवत हयनी, अने अस्तरां तमने अपनी रीत सरु परमेसर का बचण के बेकार करि लाख्यो । ⁷ हे ढोंगीहुंणो ! यसायाह ने तमारा बारामें या अगमबाणी ठीकज

करी : ⁸इ लोग होंठहुंण से तो म्हारो मान करे ,पण इणका हिरदा म्हार से दूर हे । ⁹इ बेकार म्हारी उपासणा करे अने मनखहुंण कि सिक्छाहुंण के धरम का नेम करिके सिखाड़े हे ।" ¹⁰उने भीड़ के अपणा कने बुलईके उणकासे क्यो,"सुणो अने समझिलो: ¹¹जो मुन्डा माय जाय उ मनख के खराब नी करे , पण जो मुन्डा से हिटे,उज मनख के खराब करे ।" ¹²तो चेलाहुंण ने अईके उकासे क्यो , "कई तू जाणे के इनी बात के सुणिके फरीसीहुंण के ठोकर लागी ? " ¹³पण उने ज्वाब द्यो , "हरेक रोपो जिके म्हारा पिता ने नी रोप्यो, उखाड़ियो जायगा । ¹⁴उणके रेवा दो ;वी आंधा मारग देखवा वाळा हे अने आंधो अगर आंधा के मारग बताड़े तो दोइज खाड़ा माय पड़ेगा ।" ¹⁵पतरस ने क्यो," या मिसाल हमारे समझाड़ी दे ।" ¹⁶उने क्यो,"कई तम लोग बी अबी तोड़ी नी समझिया ? ¹⁷कई तम नी जाणो के जो कई मुन्डा माय जाय ,उ पेट माय जइके मळरस्ता से हिटी जाय ? ¹⁸पण जो मुन्डा से बायरे आवे ,उ हिरदा से हिटे अने उज मनख के खराब करे । ¹⁹क्योके हिरदा सेज बुरा-बुरा बिचार ,हत्याहुंण ,परईबंडरासातेयोनाचार,ब्योभिबिचार ,चोरिहुंण ,झुंटी गवई अने निन्दा हिटे हे । ²⁰ईज बातहुंण हे जो मनख के खराब करे ,पण बिना हात धोय जिमणो मनख के खराब नी करे ।" ²¹इसु वां से हिटीके सुर अने सेदा का इलाका माय चल्यो ग्यो । ²²अने देखो ,इलाका की एक कनानी बंडरा अई अने हेला पाड़िके केवा लागी, "हे परभु दाउद की सन्तान म्हार पे दया करजे । म्हारी नानी बुरीतरां से बुरी आतमा से भरी हे ।" ²³पण उने उके कई ज्वाब नी दयो । चेला उका कने अईके केवा लाग्या ,इके मोकली दे क्योके या चिल्लाती होय हमारा पाछे पड़ी हे ।" ²⁴पण उने उणकासे क्यो , " हुं सिरप इसराइल का घराणा की भटकिहोई गाडरहुंण कने मोकलियो ग्यो हुं (याने इसराइल का भटकिया लोग) ।" ²⁵पण वा अई अने परणाम करिके उकासे केवा लागी , " परभु म्हारी मदद कर ।" ²⁶उने उकासे क्यो,"बाळकहुंण का रोट लईके कुतराहुंण का अगड़े लाखणो अचछो हयनी ।" ²⁷इ पे (उनी) बंडरा ने क्यो , "हाँ परभु ,पण कुतरा बी तो मालेख की थाळी (मेज का चलन नही है) को बच्यो चूरो खाय हे ।" ²⁸तो इसु ने क्यो , "हे नारी ,थारो बिसास बड़ो हे । जसो तू चावे वसोज थारा सरु होय ।" उकी नानी उनीज घड़ी अच्छी हुइग्यी । ²⁹वां से चलिके इसु गलील का कराड़े ग्यो अने वां परबत पे चड़िके बेठिग्यो । ³⁰अने घणी बड़ी भीड़ उका कने अई अने वी अपणा साते पांगळा ,लुला ,आन्धा, गूंगा अने नरा दुसरा लोगहुंण के लईके आया अने उणके उका चरणहुंण कने लियाया (या चरणहुंण माय लाखी दया) अने उने उणके अच्छा करिया । ³¹इकासरु जदे भीड़ ने देख्यो के गूंगा बोले ,लुला अच्छा होय,पांगळा चले अने आंधा देखे

हे तो लोग अचम्भो करता होया अने उणने इसराइल का परमेसर कि म्हेमा करी । ³² इसु ने अपणा चेलाहुंण के कने बुलाड़ीके क्यो, म्हारे भीड़ पे तरस आय हे क्योके इ लोग तीन दन से म्हारा साते हे अने इणका कने खावा सरु कंईज नी हे । हुं इणके भुका नी मोकळणो चउं , कंई असो नी होय के वी मारग मेज गस खई जाय ।" ³³ चेलाहुंण ने उकासे क्यो , "हम इनी सुनी जगा माय असी बड़ी भीड़ खवाइवा सरु इतरा जादा रोटा कां से पांवांगा ?" ³⁴ इसु ने उणकासे क्यो , तमारा कने कितरा रोटाहुंण हे ?" उणने क्यो , "सात अने जरासी मच्छीहुंण बी ।" ³⁵ तो उने भीड़ के जमीन पे बेठवा को हुकम द्यो । ³⁶ फेर उने सात रोटाहुंण अने मच्छीहुंण के लई धनबाद दी के उणके तोड़िया अने चेलाहुंण के देणो सुरु करियो , अने चलाहुंण ने भीड़ के । ³⁷ वी सगळा खईके धापिग्या अने उणने बच्या होया कोळियाहुंण से भरिया सात टोपला उठाड़िया । ³⁸ जितरा ने जिमिया उमें बंडरा अने बाळक का अलावा चार हज्जार आदमी था । ³⁹ अबे भीड़ के बिदा करिके उ नाव पे चड़िग्यो अने मगदन का इलाका माय आयो ।

16 ¹ फरीसिहुंण अने सदुकिहुंण ने कने अईके उके परखवा सरु उकासे पुच्छ्यो, "हमारे अस्मान से कंई सेनाणी बताइ ।" ² पण उने ज्वाब द्यो , "जदे साँझ होय तो तम को हो, 'मोसम अच्छो रेगा , क्योके अस्मान लाल हे ,' ³ अने सवेरा , 'के आज तोफान आयगा , क्योके आज अस्मान लाल अने डरावणो हे ।' तम अस्मान का लच्छहुंण के पेचाणणो तो जाणो हो, पण बखतहुंण की सेनाणी के नी पेचाणो ? ⁴ बुरा अने ब्योबिचारिणी पीड़ी सेनाणी ढुडे हे, पण योना की सेनाणी का अलावा इके दुसरी कोई सेनाणी नी दई जायगा ।" तो वी उके छोड़िके चल्या गया । ⁵ फेर चेला उना पार पौंच्या, पण वी रोटा लेणो भुलिग्या था । ⁶ इसु ने उणकासे क्यो, "देखोतो फरीसिहुंण अने सदुकिहुंण का खमीर से होसियार रिजो ।" ⁷ वी माय-माय बात-चित करता होया केवा लाग्या , "उ इकासरु कइरियो क्योके हम रोटा नी लाया ।" ⁸ पण इसु ने यो जाणता होया क्यो, " हे कमबिसासीहुंण , तम कायसरु माय-माय बिवाद करिरिया हो के हमारा कने रोटा हयनी ? ⁹ कंई तम अबे बी नी समझिया या रियाद करता के जदे पाँच हज्जार लोगहुंण सरु पाँच रोटा अने दो मच्छी थी तो तमने कितरा टोपला उठाया था ? ¹⁰ अने चार हज्जार सरु सात रोटा था तो तमने कितरा टोपला उठाड़िया ? ¹¹ तम कायलेणे नी समझो , के म्हने तमार से रोटा का बारामें नी क्यो थो पण यो के तम फरीसिहुंण अने

सदुकिहुंण का खमीर से होसियार रिजो ?" ¹² तो उणकी समझ माय आयो के उने रोटा का खमीर का बारामें नी, पण फरीसिहुंण अने सदुकिहुंण की सिक्छा से होसियार रेवा की क्यो थो । ¹³ जदे इसु केसरिया फिलिप्पी का इलाका माय आयो तो अपणा चेलाहुंण से पुछवा लाग्यो: मनख को बेटो कुंण हे ? लोग कंई के हे ?" ¹⁴ उणने क्यो , "कौई तो योहन बसिस्मा देवा वाळो के हे, अने कौई एलियो अने दुसरा यरमिया या नबीहुंण माय से कौई एक ।" ¹⁵ उने उणकासे क्यो , "पण तम कंई को हो ? हुं कुंण हुं ?" ¹⁶ समोन पतरस ने ज्वाब द्यो , " तू जिवता परमेसर को बेटो मसीह हे ।" ¹⁷ इसु ने उकासे क्यो , "हे सिमोन , योना का बेटा , तु धन हे , क्योके मांस अने लोई ने इके थारपे नी परगटियो, पण म्हारा पिता ने जो सरग माय हे । ¹⁸ हुं थारसे या बी कूं के तु पतरस हे अने इनी सिल्ला पे हुं अपणी कलिसिया बंणउवां , अने अधोलोक का फाटक उ पे हावी नी होयगा । ¹⁹ हुं थारे सरगराज की अने धरती की कुंचीहुंण दुंवां, अने जो कंई तु धरती पे बांदेगा उ सरग माय बंदेगा, अने जो कंई तु धरती पे खोलेगा उ सरग माय खुलेगा ।" ²⁰ तो उने चेलाहुंण के चितावणी दर्ई के वी कौई से नी के, के हुं मसीह हुं । ²¹ उना बकत से इसु मसीह अपणा चेलाहुंण के बताइवा लागो के जरुरी हे के हुं यरुसलेम आड़ी जउं अने सियाणाहुंण , मुखपुरोहितहुंण अने सासतरीहुंण से घणों दुःख भोगुं अने मारिलाख्यो जउं अने तिसरा दन जिवाइयो जउं । ²² इ पे पतरस उके इकाड़ी लइग्यो अने या कईके डांटवा लाग्यो : " हे परभु परमेसर नी करे ! थारपे असो कदी नी होणे पाय !" ²³ तो उने पलटी के पतरस से क्यो, हे सेतान , म्हारसे परे जा ! तु म्हारा सरु ठोकर की वजा हे , क्योके तु परमेसर की बात पे नी , पण मनख की बात पे हिरदो लगाइ हे ।" ²⁴ तो इसु ने अपणा चेलाहुंण से क्यो , "अगर कौई म्हारा पाछे आणो चावे , तो अपणा खुद के नकारे अने अपणो कुरुस उठईके म्हारा पाछे हुई जाय । ²⁵ क्योके जो कौई अपणो पराण बचाइणो चावे उ उके गमायेगा , पण जो कौई म्हारा सरु अपणो पराण गमायेगा उ उके पायगा । ²⁶ अगर मनख अखा जग के पईले अने अपणो पराण खोवे तो उके कंई फायदो ? या मनख अपणा पराण का बदले कंई देगा ? ²⁷ क्योके मनख को बेटो अपणा सरगदुतहुंण का साते पिता की म्हेमा माय आवा वाळो हे । जदे उ हरेक के उका कामहुंण मुजब फळ देगा । ²⁸ हुं तमार से साँची कूं के यां उब्या होया माय से थोड़क , जतक मनख का बेटा के उका राज माय आता होया नी देखिले , मरेगा हयनी (मोत को सुवाद नी चाखेगा)।"

17

¹ इसु छे: दन पाछे पतरस अने याकुब अने उको भई योहन के अपणा साते एकान्त माय एक उंचा परबत पे लई गयो । ² उणका सामे उको रुप बदलियो । अने उको मुन्डो सूरज सरिको चमकी उठ्यो ,अने उका लतरा उजाळा सरिका धोळा हुईग्या । ³ अने देखोतो, मुसो अने एलियो उका साते बात करता होया उणके नजर आया । ⁴ पतरस ने इसु से क्यो , " हे परभु ,हमारा सरु यां रेणो अच्छो हे । अगर थारी मरजी हो तो हुं यां तीन डेरा बणऊं , एक थारा सरु ,एक मुसा सरु अने एक एलिया सरु ।" ⁵ उ बोलीज रियो थो के देखो एक धोळा बादळा ने उणके छई ल्यो अने देखो बादळा माय से या अकासबाणी होई : "यो म्हारो परमिलो बेटो हे जिकासे हुं घणों खुस हुं । इकी सुणो !" ⁶ जदे चेलाहुंण ने यो सुण्यो तो वी मुन्डा का बळ पड़िग्या अने घणा डरिग्या । ⁷ इसु ने कने अईके उणके छयो अने क्यो," उठियाव ,डरो मती ।" ⁸ तो उणने अदरे नजर करी अने इसु का अलावा कोईके नी देख्यो । ⁹ जदे वी परबत से निच्चे उतरिरिया था, इसु ने उणके हुकम दई क्यो,"जतक मनख को बेटो मरिया मायसे जी नी जाय ,इना दरसन का बारामें कोईके मती किजो ।" ¹⁰ फेर उका चेलाहुंण ने उकासे पुछ्यो, अबे सासतरी कायसरु के, के एलिया के पेलां आणो जरुरी ?" ¹¹ उने ज्वाब द्यो , "एलिया को आणो जरुरी तो हे अने उ सगळो कंई सुदारेगा । ¹² पण हुं तमार से कूं ,के एलियो अई चुक्यो अने लोगहुंण ने उके नी पिचाणियो । जो कंइ उणने चायो उका साते करियो । अस्तरां मनख को बेटो बी उणका साते दुःख उठाड़ेगा ।" ¹³ तो वी समझिग्या के उने हमार से योहन बसिस्मा देवा वाळा का बारामें क्यो थो । ¹⁴ जदे वी भीड़ का कने आया तो एक मनख इसु कने आयो अने उका सामे गोड़ा टेकी के केवा लाग्या ¹⁵ "परभु ,म्हारा बेटा पे दया करजे ,क्योके उके मरगी आय अने घणो बेमार रे । उ घड़ी-घड़ी लाय माय अने पाणी माय पड़ी जाय । ¹⁶ हुं उके थारा चेलाहुंण का कने लायो थो पण वी उके अच्छो नी करी सक्या ।" ¹⁷ इसु ने ज्वाब द्यो , " हे कमबिसासी अने खराब पीड़ी का लोगहुंण हुं कदतक तमारा साते रुंवां ? हुं कदतक तमारी सउंवां ?उके म्हारा कने ल्याव ।" ¹⁸ इसु ने बुरी आतमा के डांटी अने वा उमे से हिटी गयी - अने नानो उनीज घड़ी अच्छो हुईग्यो । ¹⁹ तो चेलाहुंण ने एकान्त माय अईके क्यो, "हम उके कायसरु हेड़ी नी सक्या ?" ²⁰ उने उनकासे क्यो,"अपणा बिसास की घटी की वजा से,क्योके हुं तमार से साँची कूं के अगर तमारा माय रंई का दाणो इतरो बी बिसास होय तो इना बळ्ड़ा से को , 'यां से सरकी के वंय्याड़ी जा,'अने उ सरकी जायगा ,अने तमारा सरु कंई बी अबगो नी होयगा । ²¹ (पण या जात पराथना अने उपास का अलावा कसा दुसरा उपाव से नी हिटे)" ²² जदे वी गलील

माय भेळा हुइरिया था ,इसु ने उनकासे क्यो , " मनख को बेटो लोगहुंण का हाते पकड़वाणे वाळो हे , ²³ अने वी उके मारी लाखेगा ,पण तिसरा दन उ जिवाड़ियो जायगा ।" इपे वी घणा उदास होया । ²⁴ जदे वी कफरनहुम पोंच्या ,तो मन्दर का कर वसुळवा वाळाहुंण ने पतरस कने अईके पुच्छयो , "कंई थरो गरु कर नी चुकाड़े ?" ²⁵ उने क्यो "हाँ, चुकाड़े हे ।" जदे उ घरे आयो ,तो पैलां उकासे पुच्छयो , "सिमोन तु कंई बिचारे ? धरती का राजो चुंगी ने कर किकासे ले ,अपणा बेटाहुंण से के परायाहुंण से ?" ²⁶ उका या केणा पे के , 'परायाहुंण से , "इसु ने उकासे क्यो फेर तो बेटो कर से छूटिग्यो । ²⁷ पण असो नी होय के हम उका सरु ठोकर कि वजा बणा ,तु सरवर पे जईके बलियो लाख ,अने जो मच्छी पैला अदरे आय उके लई अने उको मुन्डो खोलवा पे थारे उकामें एक सिक्को मिलेगा । उके हेड़िके थारा अने म्हारा सरु चुकाड़ी दे ।"

18 ¹ उना बखत चेला इसु कने अईके पुछवा लाग्या , "सरग राज माय सगळा से मोटो कुंण ?" ² तो उने एक बाळक के अपणा कने बुलायो अने उके अदाइ माय उबो करिके क्यो , ³ हुं तमारे साँची कूं के जतक तम हिरदो नी बदळो अने बाळक सरिका नी बणो ,सरग का राज माय जई नी पावगा । ⁴ जो कोई अपणा खुद के इना बाळक सरिको भोळो बणाय उज सरग का राज माय सगळा से मोटो हे । ⁵ अने जो कोई म्हारा नाम से असा एक बाळक के माने उ म्हारे माने हे । ⁶ पण जो कोई इना नानाहुंण माय से जो म्हारपे बिसास राखे एक के बी ठोकर खवाड़े तो अच्छो होय के उका गळा माय घट्टी को बजनी भाटो लटकाड़िके उके समन्दर माय डुबाड़ियो जाय । ⁷ ठोकरहुंण सरु जगत पे धिक्कार ! ठोकरहुंण को आणो तो जरूरी हे ,पण धिक्कार उना मनख पे के जिकासे ठोकर लागे ! ⁸ अगर थारो हात ने थारो पग थारे ठोकर खवाड़े तो उके काटिके फेंकि लाख ; थारा सरु लुल्लो अने पांगळो हुईके जीवन पाणो इकासे घणो भलो हे के तु दो हात अने दो पग रेटा होया नरक की लाय माय लाख्यो जाय ⁹ अगर थारी आँख थारे ठोकर खवाड़े तो उके हेड़ीके फेंकी लाख ,काणो हुईके जीवन पाणो इकासे कंईज अच्छो के तु दो आँख रेतो होयो नरक की लाय माय लाख्यो जाय । ¹⁰ देखो तम इना छोटा माय से कोई के ओछा मति जाणजो ,क्योके हुं तमार से कूं उणका दुत म्हारा सरग पिता को मुन्डो सदाज देखता रे हे । ¹¹ (क्योके मनख को बेटो खोया होया के बचाइने आयो हे) ¹² तम कंई सोचिरिया हो ? अगर कोई मनख कने सो गाडर होय ने एक खोवई जाय तो कंई उ निन्याणु के बळडा पे छोड़िके उनी एक के सोदवा नी जावेगा जो

भटकिरी हे ? ¹³ अने असो होय के उ उके पईले तो हुं तमार से साँची कूं के उ उका सरु उण निन्याणु का बजाय जो गमी नी थी घणी खुसी मनावे हे । ¹⁴ तो तमारा पिता की जो सरग माय हे असी मरजी हयनी के इना छोटाहुंण माय से कोई एक बी नास होय । ¹⁵ अगर थारो भई पाप करे तो एखला माय जई के उके समझाड़ । अगर उ थारी सुणे तो तने अपना भई के पईलियो । ¹⁶ पण अगर उ थारी नी सुणे तो अपना साते एक या दो जणा हजु लइजा, जिकासे के दो या तीन गवाहुंण का मुन्डा से हरेक बात परमाणित हुई जाय । ¹⁷ अगर उ उणकी बी नी सुणे तो मन्डळी से के । अगर उ मन्डळी की बी नी सुणे तो उ थारा सरु गेर जात अने कर वसुलवा वाळा सरिको हुईग्यो । ¹⁸ हुं तमार से कूं , जो कंई तम धरती पे बाँदोगा उ सरग माय बाँदेगा ,अने जो कंई तम धरती पे खोलोगा, उ सरग माय खोल्यो जायगा । ¹⁹ हुं तमार से पाछो कूं ,अगर तमारामें से दो जणा धरती पे कसी बिणती सरु एकराय हुईजाय ,तो उ म्हारा सरग पिता आड़ी से उणका सरु पुरण हुई जायगा । ²⁰ कयोके जां दो ने तीन म्हारा नाम से भेळा होय हे, वां हुं उणका अदाइ माय हुं ।" ²¹ तो पतरस ने अईके उकासे क्यो , "परभु ,म्हारो भई कतरी बार म्हारा बिरोद कसुर करतो रे के हुं उके मांफ करूं ? कंई सात बार तोड़ी ?" ²² इसु ने उकासे क्यो , "हुं थारसे या नी कूं के सात बार तोड़िज ,पण सात बार का सत्तर गुणा तोड़ी । ²³ इकासरु सरग राज को मिलाण कसा असा राजा से करी जई सके जेने अपणो हिसाब लेणो चायो । ²⁴ जदे उ हिसाब लेवा लाग्यो तो उका सामे एक मनख लायोग्यो जिकापे करोड़ो रिप्या को करजो थो । ²⁵ पण जदे उका कने करजो चुकावा सरु कंई नी थो तो उका मालेख ने हुकम द्यो के उके अने उकी बंडरा के ,छोरा-छोरी ने जो कंई उका कने हे ,सगळो बेचिके करजो चकाड़िदयो जाय । ²⁶ इ पे सेवक उका पगेपड़िग्यो अने क्यो , 'मालेख, धीरज राख हुं सगळो कंई चुकई दुंवा ।' ²⁷ तो उना सेवक का मालेख ने तरस खईके उके छोड़ियो अने उको करजो बी मांफ करियो । ²⁸ पण (जदे)उ सेवक बायरे हिट्यो अने उको सामो उका साती सेवकहुंण माय एक से होयो जो उका सो रिप्या को करजदार थो । उने इके पकड़ियो अने गळो दबाड़िके क्यो, 'म्हारो करजो चुकाड़ !' ²⁹ इ पे उका साती सेवक पगे पड़िके बिणती करवा लाग्यो, 'धीरज राख हुं सगळो कंई चुकई दुंवा ।' ³⁰ फेर बी उ नी मान्यो अने उके तत्तक सरु जेळ माय लाखिदयो जत्तक के उ करजो नी चुकई लाखे । ³¹ यो देखिके उका सात का सेवक घणा दुःखी होया अने उणने जईके अपना मालेख के यो हाल सुणायो । ³² तो उका मालेख ने उके तेड़िके क्यो , हे दुस्त सेवक ! इकासरु के तने म्हारसे बिणती करी ,म्हने थारो सगळो करजो मांफ करिदियो थो । ³³ तो फेर म्हने

जस्तरां थारपे द्या करी ,कंई वसेज थारे बी अपणा साती सेवक पे द्या नी करनी चईये थी ?' ³⁴ अने उका मालेख ने गुस्सामें अईके उके दुःख देवा वाळाहुंण का सुपरद करियो के करजो चुकाइने तोड़ी उणकाज हात माय रे । ³⁵ अस्तरां अगर तमारा माय से हरेक (कोई)अपणा भई के हिरदा से मांफ नी करे तो म्हारो सरग पिता बी तमारा साते वसोज करेगा ।"

19 ¹ फरे असो होयो के जदे इसु इ बतहुंण करिचुक्यो तो गलील से बिदा हुइके यरदन का पेलांड़ी यहुदिया का इलाका माय आयो । ² तो एक बड़ी भीड़ उका पाछे चली पड़ी , अने उने उणके अच्छो करियो । ³ फेर थोड़ाक फरीसीहुंण उके अजमाणे सरु उका कने आया अने केवा लाग्या , "कंई आदमी सरु अपनी बंइरा (घराळी) के कसीज वजा से फारकती देणो अच्छो हे ?" ⁴ उने ज्वाब दयो , "कंई तमने नी बांच्यो के रचवा वाळा ने सुरु सेज उणके नर-नारी करिके बणाया , ⁵ अने क्यो , 'इनी वजा से आदमी अपना मां-बाप से एकाड़ी रिके अपनी घराळी से मिळ्यो रेगा अने वी दोई एक काया रेगा ?' ⁶ इकासरु वी अबे दो हयनी पण एक काया हे , जिणके परमेसर ने जोड़िया , उणके कोई मनख छेटी नी करे ।" ⁷ उणने उकासे क्यो , "तो फेर मुसा ने कायलेणे हुकम दयो के उके फारकती दई के छोड़िदे (त्यागीदे) ?" ⁸ उने उणकासे क्यो , "तमारा हिरदा का काठापण की वजा से मुसा ने घराळी के फारकती देवा की इजाजत तमारे दई , पण सुरु माय असो नी थो । ⁹ अने हुं तमार से कूं , के जो कोई ब्योबिचार का अलावा दुसरी कसी वजा से अपनी घराळी के छोड़िके दुसरी से ब्याव करे , तो उ ब्योबिचार करे हे ।" ¹⁰ चेलाहुंण ने उकासे क्यो , "अगर आदमी को सम्बन्ध अपनी घराळी से असोज हे तो कुंवारी रेणोज भलो । ¹¹ पण उने क्यो , " इनी बात के सगळा नी, पण सिरप वीज धारी सके , जिणके यो द्यो ग्यो हे । ¹² क्योके थोड़ाक हिंजड़ा हे जो मां का पेट सेज असा जन्म्या । थोड़ाक हिंजड़ा जिणके मनखहुंण ने बणई लाख्या , अने थोड़ाक असा बी हे जिणने सरग राज सरु खुद केज हिंजड़ा बणई लाख्या हे । जो इके धारी सके , उ धारे ।" ¹³ तो थोड़ा बाळक उका कने लाया के उ उणकापे हात धरिके पराथना करे , पण चेलाहुंण ने उणके डांटिया । ¹⁴ तो इसु ने क्यो , " बाळकहुंण के म्हारा कने आवा दो । उणके मना मती करो , क्योके सरग को राज असाहुंणकोज हे ।" ¹⁵ तो उणपे हात घरवा का बाद उ वां से चलयो ग्यो । ¹⁶ देखो, एक धणी मनख ने उका कने अईके क्यो , "हे गरु, हुं कांको भलो काम करुं के सदाको जीवण पउं ?" ¹⁷ उने क्यो म्हारसे भला का बारामें कायलेणे पुछे ?

सिरप एकज हे जो भलो हे अगर तु जीवण माय जाणो चावे तो हुकमहुंण को पाळण कर ।" ¹⁸उने पुछ्यो , " कांका हुकमहुंण ?" तो इसु ने क्यो ,हत्या नी करणो ,ब्योबिचार नी करणो ,चोरी नी करणो ,झुंटी गवई नी देणो , ¹⁹अपणा पिता अने अपणी मेतारी को मान करणो , अने अपणा पड़ोसी से अपणा सरिको परेम करणो ²⁰जुवान ने उकासे क्यो , " इनी सगळी के तो हुं पाळतो आयो हुं; फेर म्हारमें कंई कमकोती ?" ²¹इसु ने उकासे क्यो , " अगर तु सिध्द होणो चावे तो जा, अपणो धन बेचिके गरीब-गुरबा के दईदे , थारे सरग माय धन मिळेगा । अने अईके म्हारा पछड़े चल्योचल ।" ²²पण जदे जुवान ने यो सुण्यो तो दुःखी हुईके चल्यो ग्यो ,क्योके उ घणो धणी(मालदार) थो । ²³जदे इसु ने अपणा चेलाहुंण से क्यो,"हुं तमार से साँची कूं के धणी के सरग का राज माय जाणो कितरो अबगो हे । ²⁴हुं तमार से फेर कूं के कसा धणी के परमेसर का राज माय जावा का बजाय ऊंट के सुई का बेज माय से हिटणो सेज हे ।" ²⁵जदे चेलाहुंण ने यो सुण्यो तो वी घणा चोंक्या (दंग रड़ग्या) अने केवा लाग्या ,तो फेर केको उध्दार हुई सके ।" ²⁶इसु ने उणका आड़ी देखिके क्यो , "मनख सरु जो अबगो हे ,उ परमेसर सरु सबगो हे ।" ²⁷इ पे पतरस ने क्यो,"देखतो, हम तो सगळो कंई छोड़िके थारा पाछे चली पड़िया । तो हमारे कंई मिळेगा ?" ²⁸इसु ने उणकासे क्यो," हुं तमार से साँची कूं के तम जो म्हारा पाछे चल्या आया हो उना बखत जदे सगळो कंई पाछो नवो हुई जायगा अने मनख को बेटो अपणा म्हेमावान सिंगासण पे बिराजेगा तो तम बी बारा सिंगासण पे बिराजिके इसराइल का बारा गोत को न्याव करोगा । ²⁹अने हरेक जिने म्हारा नाम सरु घरहुंण ने भईहुंण ने बेनहुंण ने पिता अने मेतारी ने छोरा-छोरीहुंण ने खेतहुंण छोड़िलाख्या ,उ इकासे नरो गुणो जादा पायगा अने सदाकाल का जीवन को हाकिम होयगा । ³⁰पण नरा जो अगलिया हे पाछलिया होयगा,अने जो पाछलिया हे, वी अगलिया होयगा ।

20 ¹सरग को राज उना मालेख सरिको जो दन उगे इकासरु हिट्यो के मजुरियाहुंण के अपणा अंगुर का बाग माय काम करवा सरु लगाड़े । ²उने हर मजुर के एक रुप्या हरदन ठेरईके उणके अपणा अंगुर का बाग माय मोकलिया । ³फेर सवेरा का करीब नो बज्या जदे उ बायरे आयो तो दुसराहुंण के बजार माय फालतु उब्ब्या देख्या , ⁴अने उणसे क्यो , 'तम बी अंगुर का बगीचा माय जाव जो ठीक होयगा उज तमारे दुंवां ।'अने वी चल्या ग्या । ⁵फेर बारा बज्या अने तीन बज्या का करीब उने बायरे हिटी के असोज करियो । ⁶करीब पांच बज्या पाछो बायरे हिटिके उने

दुसराहुंण के वां उब्ब्या देख्या तम यां दनभर फालतु कायसरु उब्ब्या रिया ?' ⁷ उणने उकासे क्यो , 'क्योके कोईने हमारे मजुरी पे नी लगाड़िया ।' उने क्यो , 'तम बी अंगुर का बगीचा माय जाव ।' ⁸ "साँज होवा पे अंगुर का बाग का मालेख ने मुनीम के बलाड़ीके क्यो, 'मजुरियाहुंण के बुलाड़ अने पाछलिया आवा आळाहुंण से सुरु करिके अगलिया आवा वाळाहुंण तोड़ी सगळा के मजुरी दईदे ।' ⁹ करीब पांच बज्या साँज बखत जो मजुरी पे लगाड़िया था , जदे वी आया तो उणके एक-एक रुप्यो मिळ्यो । ¹⁰ जदे पैलां लगाड़िया मजुर आया तो उणने समझियो के हमारे जादा मजुरी मिळेगा , पण उणके बी एक-एक रुप्योज मिळ्यो । ¹¹ जदे उणके रुप्यो मिळ्यो तो वी या कईके मालेख पे कुड़कुड़ावा लाग्या , ¹² 'इ जो पाछे आया , इणने तो एकज घड़ी काम करियो अने तने इणके हमाराज इतरो दई थो जिणने दनभर को बजन उठाड़यो अने कड़क तड़को सयो । ¹³ पण उने उणका माय से एक के ज्वाब थो , 'दोस , हुं थारा साते कोई अन्याव नी करिरियो हुं । कई तने म्हारा साते एक रुप्यो मजुरी ते नी करी थी ? ¹⁴ जो थारो हे उके लईले अने चल्यो जा । या म्हारी मरजी के जितरो थारे दयो उतरोज इका पाछे आवा वाळा के बी दउं । ¹⁵ कई म्हारा सरु यो ठीक हयनी के जो म्हारो हे उकासे जो चउं उ करुं ? कई म्हारो उदार होणो थारी आँखहुंण माय खटके हे ?' ¹⁶ अस्तरां जो पाछलिया हे वी अगलिया होयगा । अने जो अगलिया हे , वी पाछलिया होयगा ।" ¹⁷ जदे इसु यरुसलेम जावा पे थो तो बारा चेलाहुंण के एखला माय लई जईके मारग माय उणकासे केवा लाग्यो , ¹⁸ देखो, हम यरुसलेम जईरिया हे । मनख को बेटो मुखपरोहितहुंण का हाते पकड़वायो जायगा , अने वी उके मोत की सजा का लायक ठेरायगा । ¹⁹ वी उके गेर यहुदीहुंण का हाते सोपेगा के वी उको मजाक उड़ाय , कोड़ा मारे , उके सलीब पे चड़ाय , अने तीसरा दन उ जिवाड़यो जाय ।" ²⁰ तो जब्दी का बेटाहुंण की मेतारी अपणा बेटाहुंण का साते उका कने अई अने परणाम करिके याचना करवा लागी । ²¹ इसु ने उकासे क्यो, " तु कई चावे ?" वा केवा लागी , " हुकम दे के थारा राज माय म्हारा इ दोई बेटा एक थारा सुदाड़ी (जीवणाड़ी) अने एक थारा डाबाड़ी बेठे ।" ²² पण इसु ने ज्वाब थो , " तम नी जाणो के कई मांगिरिया हो । कई तम उ कटोरो पी सको जिके हुं पीवा पे हुं ?" उणने क्यो, " हम पी सकांगा ।" ²³ उने उणकासे क्यो , "म्हारो कटोरो तो तम पियोगा; पण अपणा जिवणा अने डाबाड़ी बेठाणो म्हारा हक माय हयनी । यो तो उणका सरु हे जिणका सरु तियार क्यो ग्यो हे ।" ²⁴ या सुणिके दसी चेला उना दोई भईहुंण पे गुस्सा होया । ²⁵ पण इसु ने उणके अपणा कने तेड़िके क्यो, " तम जाणों हो के गेर यहुदिहुंण का हाकिम उणपे राज करे, अने उणका बड़ा

लोग उणपे हक जताड़े । ²⁶तमारा माय असो नी होय । जो कोई तमारा माय बड़ो बणनो चावे उ तमारो सेवक बणे , ²⁷अने जो तमारा माय परधान होणो चावे उ तमारो सेवक बणे - ²⁸जस्तरां मनख को बेटो बी अपणी सेवा-चाकरी कराणे नी पण सेवा करवा अने नराके छुड़ावा का मोलमें अपणो पराण देवा आयो । ²⁹जदे वी यरीहो से हिटीके जई रिया था तो एक घणी मोटी भीड़ उका पाछे चली पड़ी । ³⁰अने देखो ,बाट का मेरे बेठिया दो आंधा या सुणिके के इसु जईरियो हे ,हेला पाड़ीके केवा लाग्या," हे दाउद की ओलाद ,हमार पे दया करजे !" ³¹भीड़ का लोगहुंण ने उणके डांटीके क्यो के छानो रे,पण वी हजुज जोर से चिल्लाड़ीके केवा लाग्या , "हे परभु ,दाउद की सन्तान ,हमार पे दया करजे ।" ³²तो इसु ने रुकी के उणके बुलाड़िया ,अने क्यो ,तम कई चाव के हुं तमारा सरु करुं ?" ³³उणने उकासे क्यो,"परभु, हम चावां के हमारी आँखहुंण खुलिजाय ।" ³⁴इसु ने तरस खईके उणकी आँखहुंण के छेयो, अने वी झटज देखवा लाग्या अने उका पाछे चलि पड़िया ।

21 ¹जदे वी यरुसलेम कने पोंचीके जेतुन परबत पे बेतफगे आड़ी आया ,तो इसु ने दो चेला के मोकलिया , ²अने उणसे क्यो,"अपणा सामे का गाम माय जाव । वां जाताज तमारे एक गदड़ी का साते उको बचड़ो बंध्यो होयो मिळेगा । उणके खोलिके म्हारा कने ल्याव । ³अगर तमार से कोई कई के तो किजो के , 'परभु के इकी जरुवत हे , 'अने उ झट उनके भेजी देगा ।" ⁴यो इकासरु होयो के जो बचन नबी से केवायो ग्यो थो उ पुरण होय : ⁵सिय्योन कि बेटा से को , 'देख,थारो राजो थारा कने अइरियो हे ; उ नरम,अने गदड़ा पे, याने गदड़ी का बच्चा पे मने लादु का बच्चा पे बेठ्यो हे ।" ⁶चेलाहुंण ने जईके जसो इसु ने उणके बताड़ियो थो ,वसोज करियो । ⁷उणने गदड़ी अने उका बचड़ा के लईके उणपे अपणा लतरा बिछाड़िया,अने उ बेठिग्यो(सवार हुईग्यो)। ⁸भीड़ माय से नरा ने अपणा लतरा बाट माय बिछाड़िया अने दुसराहुंण ने झाड़काहुंण से डाळी काटिके बाट माय बिछाड़ी । ⁹जो भीड़ उका अगड़े जईरी थी अने वी बी जो उका पाछे चल्या अईरिया था हेला पाड़ी-पाड़ीके कईरिया था , "दाउद की सन्तान के होसान्ना ! धन हे उ जो परभु का नाम से आवे हे सगळा से उंची जगा माय होसान्ना !" ¹⁰जदे उणने यरुसलेम माय (पगधरियो)परवेस करियो तो अखा नगर माय हलचल मचीग्यी अने सगळा केवा लाग्या , "यो कुंण हे ?" ¹¹अने भीड़ का लोग कईरिया था , "यो गलील

का नासरत को नबी इसु हे ।" ¹² इसु ने मन्दर माय जईके उना सगळा के जो मन्दर माय लेण-देण करिरिया था हेड़िलाख्या, अने रुप्या का बदळामें वां कि चलण का रुप्या देवा वाळाहुंण की मेज अने कबुतर बेचवा वाळाहुंण की चोकीहुंण पल्टीदी । ¹³ अने उने उणकासे क्यो, 'लिक्ख्यो हे, 'म्हारो घर पराथना को घर केवायगा, पण तम उके डकेतहुंण की खो बणाव हो ।" ¹⁴ तो आंधा अने पांगळा उका कने मन्दर माय आया अने उने उणके अच्छा करिया । ¹⁵ पण जदे मुखपुरोहित अने सास्तरीहुंण ने उना अचम्भा का काम जो उने करिया था देख्या अने बाळकहुंण के जो मन्दर माय यो नारो लगई रिया था, 'दाउद की सन्तान के होसान्ना , तो वी गुस्सामें अईग्या , ¹⁶ अने उणने उकासे क्यो, "कंई तु सुणे हे के ई कंई की रिया हे ?" इसु ने उणकासे क्यो, 'हां, "पण कंई तमने यो कदी नी बांच्यो: बाळकहुंण अने धाता बच्चाहुंण से तने अपणा सरु इसतुति तियार करी हे ?" ¹⁷ तो उ उणके छोड़िके नगर का बायरे बेतनिय्या ग्यो अने वांज रुक्यो । ¹⁸ दन उगे नगर आड़ी आता बखत उके भुक लागी । ¹⁹ तो उ बाट का मेरे एक अंजीर का झाड़ के देखिके उका कने ग्यो , पन उपे पत्ताहुंण का अलावा कंई नी लादो । तो उने उकासे क्यो, " अबसे थारामें कदी फळ नी लागेगा ।" अंजीर को झाड़ उनीज बखत सुकिग्यो । ²⁰ यो देखिके चेलाहुंण अचम्भामें पड़िग्या अने केवा लाग्या , "अंजीर को झाड़ झट कसे सुकिग्यो ?" ²¹ इसु ने उणकासे क्यो, " हुं तमार से साँची कूं के अगर तम बिसास राखो अने सक नी करो तो नी सिरप यो करोगा जो इना अंजीर का झाड़ का साते करियो , पण अगर तम इना परबत से बी को, 'उखड़ी जा अने समन्दर माय जई पड़, 'तो यो हुई जायगा । ²² अने जो कंई तम पराथना माय बिसास से मांगोगा उ तमारे मिळेगा ।" ²³ जदे उ मन्दर माय अइके परबचण दर्इरियो थो तो खास याजकहुंण अने सियाणाहुंण ने उका कने अईके क्यो, "तु केना हक से यो काम करिरियो हे , अने केने थारे यो हक द्यो ?" ²⁴ पण इसु ने उणके ज्वाब द्यो, हुं बी तमार से एक बात पुछुं । अगर तम म्हारे उको ज्वाब दोगा , तो हुं बी तमारे बतउंवा के हुं केका हक से यो काम करुं । ²⁵ योहन को बसिस्मो के का आड़ी से थो , सरग आड़ी से के मनख आड़ी से ?" अने वी या कईके माय-माय बिचार करवा लाग्या , " अगर हम कां , 'सरग आड़ी से तो उ हमार से केगा , तो फेर तमने उको बिसास कायसरु नी करियो ?" ²⁶ पण अगर हम कां , 'मनख आड़ी से , 'तो हमारे भीड़ को डर, क्योके वी सगळा योहन के नबी माने हे ।" ²⁷ तो उणने इसु के ज्वाब द्यो , "हम नी जांणा । तो उने बी उणकासे क्यो , "हुं बी तमारे यो नी बतउंवा के केका हक से यो काम करुं हे । ²⁸ पण तम कंई सोचिरिया हो ? कोई मनख का दो बेटा था अने उने पैला कने

जईके क्यो, 'बेटा जा, आज अंगुर का बाग माय काम कर ।' ²⁹ अने उने ज्वाब द्यो हां, हुं जउंवा, 'पण उ नी गया' । ³⁰ फेर बाप ने दुसरा का कने जईके वसोज क्यो, पण उने ज्वाब दयो, 'हुं नी जउंवा ।' फेर बी उ इका पाछे पस्तायो अने ग्यो । ³¹ इना दोईमें से केने अपना बाप की मरजी पुरण करी ?" उणने क्यो, "दुसरा ने ।" इसु ने उनकासे क्यो, "हुं तमार से साँची कू के तमार से पैलां, चुंगी लेवा वाळा अने बेस्याहुंण (बांचड़ीहुंण) परमेसर का राज माय जायगा । ³² क्योके योहन तमारा कने धरम को मारग बताइने आयो अने तमने उको बिसास नी करियो । पण चुंगी लेवावाळाहुंण अने बेस्याहुंण ने उको बिसास करियो, पण यो देखिके बी तमारे बादमें पस्तावो नी होयो के उको बिसास करता । ³³ एक हजु मिसाल सुणो । एक मालेख थो जिने अंगुर को बाग लगाइयो अने बागर लगाड़ी के घेरयो । अने उका भितरे रस-कुंड खोदयो अने एक डागळो बणायो फेर उने किरसाणहुंण के (बांटा) ठेका पे दईके जात्रा पे चलयो ग्यो । ³⁴ जदे फसल काटवा को बखत आयो तो उने अपना सेवकहुंण के किरसाणहुंण कने फसल लेवा सरु मोकलिया । ³⁵ पण किरसाणहुंण ने उका सेवकहुंण के पकड़िके एक के कुट्यो, दुसरा के मारी लाख्यो अने तिसरा के ढेगळा से मारियो । ³⁶ फेर उने सेवकहुंण को एक हजु टोळो मोकलियो जो पैलां से घणो मोटो थो, अने उणने उणका साते बी असोज करियो । ³⁷ पण आखरमें उने अपना बेटा के इनी आसा से उणका कने मोकलियो के, वी म्हारा बेटा को मान राखेगा ।, ³⁸ पण जदे किरसाणहुंण ने बेटा के देख्यो तो माय-माय क्यो, 'यो तो वारिस हे । आव, हम इके मारी लाखां अने इकी सगळी जायदाद छुड़ई लां । (बिरासत पे कब्जो करि लां) ³⁹ तो उणने उके पकड़ियो अने अंगुर का बाग से बायरे हेड़िके मारी लाख्यो । ⁴⁰ इकासरु जदे अंगुर का बगीचा को मालेख आयगा तो उना किरसाणहुंण का साते कंई करेगा ?" ⁴¹ उणने उकासे क्यो, "उ उना दुस्टहुंण के बुरा तरिका से नास करेगा अने अंगुर को बाग को ठेको दुसरा किरसानहुंण के दई देगा जो सई बखत पे उके फळ दया करेगा ।" ⁴² इसु ने उणकासे क्यो, 'जेना एरण के राज मिस्तरीहुंण ने ठोकरई दयो थो, उज कोणा को एरण बणिग्यो । यो परभु आड़ी से होयो अने हमारी आँखहुंण माय म्हान हे ?' ⁴³ इका सरु हुं तमार से कू के परमेसर को राज तमार से लई लियो जायगा अने एक असी जात के जो उको फळ लाय, उके दई दयो जायगा । ⁴⁴ जो कोई इना एरण पे पड़ेगा उ चकणा-चूर हुई जायगा, पण जेना कोई पे यो एरण पड़ेगा, उके पीसीके धुळो करी देगा ।" ⁴⁵ जदे मुखपुरोहितहुंण अने फरीसीहुंण ने उकी या मिसाल सुणी तो वी समझिग्या के उ हमाराज बारामें कईरियो हे । ⁴⁶ अने जदे उणने उके पकड़णो चायो तो वी भीड़ से डरिग्या, क्योके लोग उके नबी

22 ¹इसु ने पाछो उणकासे मिसाळहुंण माय क्यो, ²" सरगराज को मिलाण एक राजा से करी जई सके जिने अपणा बेटा का ब्याव को भोज करियो । ³उने भोज माय नोट्या लोगहुंण के बुलावा सरु अपणा सेवक मोकलिया ,पण उना लोगहुंण ने आणो नी चायो । ⁴फेर उने दुसरा सेवकहुंण के या कईके मोकलिया :पांवणाहुंण से को , "देखो, हुं भोज तियार करी चुक्यो हुं । म्हारा बेल अने पाळिया होया ढोर काट्य जई चुक्या हे अने सबकई तियार हे । ब्याव-भोज माय आव" । ⁵पण उणने कोई ध्यान नी थो अने अपणा रस्ता पे चली पड़िया , एक अपणा खेत आड़ी अने दुसरा अपणा ब्योपार आड़ी , ⁶अने बाकि ने उका सेवकहुंण के पकड़ियो अने बुरो बरताव करिके उणके मारी लाख्या । ⁷तो राजा ने गुस्सा माय अईके (चड़ई करी दी) सेना मोकली दी अने उना हत्याराहुंण के नास करिके उणको नगर बाळी लाख्यो । ⁸फेर अपणा सेवकहुंण से क्यो ,ब्याव को भोज तो तियार हे ,पण वी जो तड़िया गया था लायक नी हिट्या । ⁹इकासरु खास चोरायाहुंण पे जाव अने जितरा बी तमारे मिळे ,ब्याव का भोजमें तेड़ी लाव ।" ¹⁰वी सेवक सेरी-गळीहुंण माय गया अने जो बी अच्छा-बुरा मिळया ,सगळा के भेळा करिया ; अने ब्याव को घर (भोज) पांवणाहुंण से भरई गयो । ¹¹पण जदे भोज माय भेळा होया पांवणाहुंण के देखवा सरु आयो, तो उने वां एक मनख के देख्यो जो ब्याव का लतरा पेरियो होयो नी थो , ¹²अने उने उकासे क्यो,'दोस, तु यां ब्याव का लतरा परिया बिना कसे अइग्यो?' अने उ कई नी कई सक्यो । ¹³तो राजा ने अपणा सेवकहुंण से क्यो, 'उका हात अने पग बांदीके उके बायरे इन्दारा माय लाखी दो । वां रोणो अने दांत पिसणो होयगा ।' ¹⁴क्योके तेड़िया होया तो नरा पण छांट्या होया कमती हे ।" ¹⁵तो फरीसीहुंण ने जईके माय-माय बिचारयो के कस्तरां उके उकीज बातहुंण माय फँसाड़ां । ¹⁶उणने अपणा चेलाहुंण के हेरोदियाहुंण का साते यो केवा मोकलिया :हे गरु ,हम जाणां के तु साँचो हे अने परमेसर को मारग सच्चई से सिखाड़े , अने कोई का दबावमें नी आवे ; क्योके तु कोई की तरफदारी नी करे । ¹⁷इकासरु हमारे बताड़ के तु कई सोचे :केसर के कर चुकाइणो ठीक हे के नी ?" ¹⁸इसु ने उणकी चालाकी जाणीके क्यो, हे कपटियाहुंण ,म्हारे कायसरु परखीरिया हो ? ¹⁹म्हारे उ सिक्को बताड़ो जिकासे कर चुकायो जाय हे । तो वी उका कने एक चाँदी को सिक्को लाया । ²⁰उने उणकासे क्यो , "या छाप अने लेख केको हे ?" ²¹उणने उकासे क्यो,"कैसर को ।" तो उने

उणका से क्यो," जो कैसर को हे उ कैसर के दो ,अने जो परमेसर को हे उ परमेसर के दो ।" ²² या सुणिके वी चक्करमें पड़िग्या अने उके छोड़िके चल्या गया । ²³ उनाजदन थोड़ा सदुकी -जो के कि मरिया पाछे जी उठणो हेज नी -उका कने आया अने उसे पुछवा लाग्या , ²⁴ "गरु ,मुसा ने क्यो थो ,अगर कोई आदमी बेओलाद मरिजाय तो उको भई उकी बंडरा से ब्याव करिके उका भई सरु ओलाद पेदा करे ।" ²⁵ अबे हमारा यां सात भई था । पैलो, ब्याव करिके मरिग्यो अने ओलाद नी होवा की वजासे अपनी घराळी के अपना भई सरु छोड़िग्यो । ²⁶ अस्तरां दुसरा अने तिसरा ने बी करियो ,अने सातवां तोड़ी योज होयो । ²⁷ अने आखरमें वा बंडरा बी मरी गयी । ²⁸ तो जी उठवा पे वा सातहुंण माय से केकी घराळी रेगा ? क्योके वा सगळा की घराळी रई चुकी थी ।" ²⁹ पण इसु ने उके ज्वाब द्यो , "तम भुलमाय पड़िया हो क्योके पवित्तर सासतर ने परमेसर की ताकत के नी जाणो । ³⁰ क्योके पाछो जी उठणा पे लोग नी तो ब्याव करे अने नीज ब्यावमें द्या जाय ,पण सरग माय वी दुतहुंण सरिका होय । ³¹ कंई मरियाहुंण का पाछा जी उठवा का बारामें तमने यो बचण नी बांच्यो जो परमेसर ने तमार से क्यो थो : ³² हुं इबराहिम को परमेसर अने इसाक को परमेसर अने याकुब को परमेसर हुं ? उ मरियाहुंण को नी, पण जीवताहुंण को परमेसर हे ।" ³³ जदे लोगहुंण ने यो सुण्यो तो वी उका परबचन से चकित रई गया । ³⁴ जदे फरीसीहुंण ने यो सुण्यो के उने सदुकीहुंण को मुन्डो बंद करि दयो(की बोलती बन्द करि दी) तो वी भेळा होया । ³⁵ अने उणका माय से एक ने जो ब्योवसतापक(नेम को जाणकार) थो,परखवा सरु उकासे सवाल करियो। ³⁶ "हे गरु,नेम माय कांको हुकम खास हे ?" ³⁷ उने उकासे क्यो," तु परभु अपना परमेसर से अपना अखा हिरदा अने अपना अखा पराण अने अपनी अखी अकल से परेम राख । ³⁸ योज बड़ो ने खास हुकम हे । ³⁹ अने उकाज सरिकी दुसरी या हे :तु अपना पड़ोसी के अपना सरिको परेम राख ।" ⁴⁰ इज दो हुकमहुंण अखा नेम अने नबीहुंण को अधार हे ।" ⁴¹ जदे फरीसी भेळा होया था ,तो इसु ने उणका से एक सवाल पुछ्यो : ⁴² मसीह का बारामें तम कंई सोचो हो ? उ के को बेटो हे ?"उणने उका से क्यो , "दाउद को ।" ⁴³ उने उणका से क्यो ,तो (फेर) दाउद आतमा माय उके ' परभु ' कायसरु के ,याने ⁴⁴ 'परभु ने म्हारा परभु से क्यो,म्हारा सुदाड़ी बेठ ,जतक के हुं थारा बेरीहुंण के थारा पग की चोकी नी बणई दुं "?" ⁴⁵ अगर दाउद उके परभु के तो उ उको बेटो कसे होयो?" ⁴⁶ कोई बी उके कंई ज्वाब नी दई सक्या ,अने उनादन से हजु सवाल करवा की हिम्मत नी होई ।

23

¹तो इसु ने भीड़ से अने अपना चेलाहुंण से क्यो , ²"सासतरी अने फरीसी खुद मुसा की गादी पे बैठग्या हे । ³इकासरु जो कई वी तमार से के उके करजो अने मानजो ,पण उणका सरिका काम मति करजो ;क्योके वी के तो हे पण करे हयनी । ⁴वी घणा बजन के बांधीके मनखहुंण का कांधा पे लादी दे , पण खुद उणके अपनी अंगळी से बी नी चोटणो चावे ।(टळो बी नी दे) ⁵वी अपणो सगळो काम मनखहुंण के बताइवा सरु करे । वी अपना तावीजहुंण के चोड़ा करे अने अपना लतराहुंण की झालरहुंण के लम्बी करे । ⁶अने दावतहुंणमें आदर की जगा ने पराथनाघरहुंण माय खास आसण , ⁷अने बाजारहुंण माय मान सम्मान पाणो ने लोगहुंण से 'रब्बी' केलाणो उणके भावे । ⁸पण तम 'रब्बी' मत केवाइजो ,क्योके तमारो एकज गरु हे अने तम सगळा भई हो । ⁹धरती पे कोई के अपणो बाप मति किजो,क्योके तमारो एकज बाप हे ,जो सरग माय रे । ¹⁰तम अगवो मती केवाइजो क्योके तमारो एकज अगवो हे याने मसीह । ¹¹पण जो तमारा माय सगला से मोटो हे उ तमारो सेवक होयगा । ¹²जो कोई अपना आपके मोटो(उंच्यो) बणावेगा उ निच्यो करियो जायगा,अने जो खुद के निच्यो(नानो) बणावेगा उ मोटो करियो जायगा । ¹³हे ढोंगी सासतरी अने फरीसीहुंण ,तमार पे धिक्कार ! क्योके तम मनखहुंण सरु सरग को राज बन्द करि लाखो हो । तम नी तो खुद जाव हो अने नीज जावा वाळाहुंण के भितरे जावा दो हो । ¹⁴(हे ढोंगी सासतरी अने फरीसीहुंण ,तमार पे धिक्कार ! क्योके दिखावा सरु बड़ी-बड़ी पराथनाहुंण करता होया बी तम रांडीहुंण का घरहुंण के गिली जाव हो ,एकासरु तमारे घणी सजा मिळेगा ।) ¹⁵हे ढोंगी सासतरी अने फरीसीहुंण ,तमार पे धिक्कार ! तम एक मनख के अपना आड़ी(मत माय लाणे सरु) मिळाने सरु धरती-असमान(जल-थल माय फिरो) एक करी दो ,अने उ जदे अइ जावे तो उके अपना से दुगणो पापी (नारकीय) बणई लाखो हो । ¹⁶"हे आंधा अगवाहुंण ,तमार पे धिक्कार! जो को हो ,अगर कोई मन्दर की सोगन खाय ,तो कईनी, पण मन्दर का सुन्ना की सोगन खाय तो उ बंदी जायगा ।" ¹⁷हे मुख ने आंधाहुंणो, कई जरुरी हे सुन्नो के उ मन्दर जो सुन्ना के पवितर करे हे ? ¹⁸फेर को हो, 'अगर कोई बेदी का चड़ावा की सोगन खायगा तो उ बंदी जायगा ।' ¹⁹हे आंधाहुंणो, कई जरुरि हे, चड़ावो के वा बेदी जो चड़ावा का पवितर करे हे ? ²⁰इकासरु जो सोगन खाय, उ बेदी अने उपे धरियो चड़ावो दोईज की सोगन खाय हे । ²¹जो मन्दर की सोगन खाय ,उ मन्दर ने उमें(उकामे) रेवा वाळा परमेसर की बी सोगन खाय हे, ²²अने

जो सरग की सोगन खाय, उ परमेसर का सिंगासण अने उकापे (उपे) बेठवा वाळा दोई की सोगन खाय हे । ²³"हे ढोंगी सासतरी - फरीसीहुंण, तमार पे धिक्कार ! तम पोदिनो, सोंप अने जीरा को दसमों हिस्सो तो दो हो, पण नेम की गेरी बातहुंण याने न्याव, दया, अने बिसास के टाळो हो, पण होणो तो यो थो के इनी बातहुंण के करता होया दुसरी बातहुंण के बी नी टाळता । ²⁴हे आंधा अगवाहुंण, तम मच्छर के तो छाणी लाखो, पण ऊंटड़ा के गिली जाव हो ! ²⁵"हे ढोंगी सासतरी अने फरीसीहुंण तमार पे धिक्कार ! तम कटोरा अने परात के बायरे से तो मांजो हो, पण भितरे से वी हरतरां की लूट अने बेकाबु से भरिया होया हे । ²⁶हे आंधा फरीसी, पैलां कटोरा अने परात के भितरे से मांज जिकासे के वी बायरे बी साफ हुई जाय । ²⁷हे ढोंगी सासतरी अने फरीसीहुंण, तमार पे धिक्कार ! तम चुना से पोती होई कबरहुंण सरिका हो जो बायरे से तो सुन्दर नजर आय, पण भितरे मुरदा का हड़काहुंण अने सगळी सड़ांद से भरी होई हे । ²⁸अस्तरां तम बी बायरे से मनखहुंण के धरमी नजर आव, पण भितरे ढोंग अने अधरम भरियो होयो हे । ²⁹"ढोंगी सासतरी अने फरीसीहुंण, तमार पे धिक्कार ! तम नबीहुंण कि कबरहुंण तो बणाव अने धरमीहुंण की रियादगारी सजाड़ो हो, ³⁰अने को हो, अगर हम अपना पुरखाहुंण का बखत माय होता, तो नबीहुंण कि हत्यामें हिस्सो नी लेता । ³¹निचोड़ यो के तम खुद अपना बिरोधमें गवई दो हो, के तम नबिहुंण का हत्याराहुंण की ओलाद हो । ³²अबे तमने अपना पुरखाहुंण का पाप को गागर भरी लाखो । ³³हे सरपहुंण, हे करेतहुंण का कणाहुंण, तम नरक की सजा से कसे बचोगा ? ³⁴इकासरु देखो, हुं तमारा सरु नबीहुंण अने जानीहुंण अने सासतरीहुंण के मोकली रियो हुं । तम उणका माय से थोड़ाक की हत्या करोगा अने थोड़ाक के सूली पे चड़वगा, फेर थोड़ाक के अपना पराथना घर माय कोड़ा लगाड़ोगा अने नगर-नगर सताड़ता फिरोगा, ³⁵के जितरा धरमीहुंण को लोई धरती पे बिवाड़यो ग्यो, उ तमारा माथे पड़े, याने धरमी हाबिल से लिके बिरिक्याह का बेटा जकरयाह तोड़ी, जिके तमने मन्दर अने बेदी का अदाइमें मारी लाख्यो थो । ³⁶हुं तमार से साँची कूं, इ सगळी बातहुंण इनी पीड़ी का माथे पड़ेगा । ³⁷"हे यरुसलेम, हे यरुसलेम ! तु नबीहुंण के मारी लाखे अने जो थारा कने मोकलिया जाय, उणके भाटा मारिया जाय हे । म्हने कितरी बार चायो के जसे मुरगी अपना बच्चाहुंण के पांख तळे भेळा करे, वसोज हुं बी थारा बच्चाहुंण के भेळा करूं, पण तमने नी चायो । ³⁸देखो, तमारो घर तमारा सरु उजाड़ छोड़ियो जाय हे । ³⁹क्योके हुं तमार से कूं के अब

से तम म्हारे तत्तक नी देखोगा जत्तक यो नी कोगा : 'धन हे उ जो परभु का नाम से आवे हे'।"

24 ¹जदे इसु मन्दर से हिटीके बायरे जईरियो थो तो उका चेला मन्दर का भवन के दिखाइवा उका कने आया। ²तो उने उणकासे क्यो, "कई तम इ सगळो नी दखिरिया ? हुं तमार से साँची कूं , यां एक एरण का अदरे दुसरो एरण बी नी रेगा जो ढळायो नी जायगा ।" ³जदे उ जेतुन परबत पे बेठियो थो तो उका चेला एकला माय उका कने अईके केवा लाग्या, हमारे बताइ इ बातहुंण कदे होयगा ,अने थारा आवा को ने इना युग के खतम होवा की कई सेनाणी होयगा ?" ⁴इ पे इसु ने ज्वाब दयो, "होसियार रो, कोई तमारे धोको नी दे, ⁵क्योके नरा लोग म्हारा नाम से यो केता आयगा, हुं मसीह हुं , 'अने नरा के धोको देगा । ⁶तम लइईहुंण का बारामें अने लइईहुंण की अफवा सुणोगा । देखो, डरजो मती क्योके इणको होणो जरूरी हे , पण उना बखत अन्त नी होयगा । ⁷क्योके जात, जात को बिरोध अने राज, राज को बिरोध हुई जायगा अने नरी जगाहुंण पे बिखो पड़ेगा अने धरती हलेगा । ⁸पण इ सगळी बातहुंण तो पिड़ाहुंण की सुरुवातज होयगा । ⁹तो वी तमारे कलेस देवाइने सरु तमारे पकड़वायगा अने मारी लाखेगा अने म्हारा नाम का वजा से अखी जातिहुंण तमार से घरणा करेगा । ¹⁰उना दनहुंण माय नरा लोग ठोकर खायगा अने एक दुसरा से बिसासघात अने एक दुसरा से घिरणा करेगा । ¹¹अने नरा झुटा नबी उठ्यायगा अने नरा के भरमायगा । ¹²अधरम का बड़वा की वजा नरा को परेम ठंडो पड़ि जायगा । ¹³पण जो आखरी तोड़ी धीरज धरयो रेगा , उकोज उद्धार होयगा । ¹⁴राज को यो सुसमिचार अखा जगत माय परचार करियो जायगा के सगळी जातहुंण पे गवई रे , अने फेर अन्त अइ जायगा । ¹⁵तो जदे तम उनी उजाइवा वाळी धरणीत चीज के , जेका बारामें दानियल नबी ने क्यो थो, पवित्तर जगा उबि देखो- बांचवा वाळो समझी ले - ¹⁶तो वी जो यहुदिया माय होय, परबत पे दोड़ी जाय । ¹⁷जो घर का छज्जा पे होय, उ घर माय कई लेवा सरु निच्चे नी उतरे । ¹⁸जो खेत माय होय , उ अपणो लतरो लेवा सरु पाछे नी आवे । ¹⁹उणका सरु धक्कार जो उनादनहुंण माय गरभ से होयगा अने जो दुध धवाइती होयगा ! ²⁰पराथना करो के तमारे स्याळा माय ने सबत का दन भागणो नी पड़े । ²¹क्योके असो (भयंकर, भयानक, खतरनाक) घोर संकट होयगा जसो नी तो जगत का सुरु से अब तोड़ी होयो अने नी कदी होयगा । ²²अने अगर वी दन घटाड़िया नी जाता तो एक बी पराणी नी बचतो, पण(छांट्या) चुण्या होया की वजा वी दन घटाई दया जायगा । ²³तो फेर अगर

कोई तमार से के ,देखो, मसीह यां हे' ने वां हे , ' तो बिसास मती करजो । ²⁴ क्योके झुटा मसीह अने झुटा नबी उठ्यायगा (परगटेगा) ने बड़ा-बड़ा चमत्कार अने अदभुत काम बताड़ेगा, यां तोड़ीके अगर हुई सके तो चुण्या होया के बी भरमई(बरगलई) लाखे । ²⁵ देखो,म्हने पैलांज तमारे बताड़ी यो । ²⁶ इकासरु, अगर कोई तमार से के, 'माळ माय हे, 'तो बायरे मती हिटी जावजो,या 'देखो,उ कोठड़ी माय हे तो बिसास मती करजो । ²⁷ क्योके जसे बिजळी उगणुं (आड़ी) से हिटीके आथणुं (आड़ी)तोड़ी चिलके ,वसोज मनख का बेटा को बी आणो होयगा । ²⁸ जां लास होय, वांज चीलगरदन(गिद) भेळी होयगा । ²⁹ उना दनहुंण का संकट का झट बाद सुरज इन्दारियो हुई जायगा ने चन्दरमा अपणो उजाळो नी देगा,अने अस्मान से तारागण पड़ेगा, ने अस्मान की ताकत हलाड़ी जायगा । ³⁰ तो मनख का बेटा कि सेनाणी अस्मान माय नजर आयगा, अने धरती की सगळी जातहुंण (कळाप) रुदन करेगा, अने लोग मनख का बेटा के सक्ती ने बड़ा बैभव (का) साते अस्मान का बादळाहुंण पे आता देखेगा । ³¹ अने उ तुरी की घणी अवाज का साते अपणा सरगदुतहुंण के मोकलेगा, अने वी चारी दिसाहुंण माय अस्मान का एक कनारा से दुसरा कनारा तोड़ी, उका चुण्या होया के भेळा करेगा । ³² अंजेर का झाड़ से या मिसाल सिको: जदे उकी डाळ नरम हुई जाय अने उकामाय पत्ता हिटवा लागे,तो तम जाणी लो हो के उनाळो कने हे । ³³ अस्तरां जदे तम इनी बातहुंण के होता देखो तो जाणी लिजो के उ कने हे ,बरण दरवाजा पेज हे । ³⁴ हुं तमार से साँची कूं ,के जतक इ सगळी बातहुंण पुरण नी हुई जाय इनी पीड़ी को अन्त नी होयगा । ³⁵ अस्मान अने धरती टळी जायगा, पण म्हारा बचण कदी नी टळेगा । ³⁶ उना दन ने उनी घड़ी का बारामें कोई नी जाणे - नीतो सरगदुत अने नीज बेटो, पण सिरप पिता(परमेसर)। ³⁷ मनख का बेटा को आणो बिल्कुल नूह का दनहुंण का सरिको होयगा । ³⁸ क्योके जलपरलय का पैलां का दनहुंण माय जस्तरां नूह का झाज माय आवा दन तोड़ी लोग खाता-पीता रिया, अने उणका माय ब्याव-सादीहुंण हुई री थी, ³⁹ अने जतक जलपरलय उणके बिवाड़ी नी लईग्यो वी इके समझिनी सक्या, उनीतरां मनक का बेटा को बी आणो होयगा । ⁴⁰ उना बखत दो मनख खेत माय होयगा ;एक लईलियो जायगा अने दुसरा के छोड़ी लाखेगा(लाख्यो जायगा) । ⁴¹ दो बंइराहुंण घट्टी पीसीरी होयगा ;एक लईली जायगा अने दुसरी छोड़ी लाखेगा । ⁴² इकासरु जागता रो ,क्योके तम नी जाणो के तमारो परभु केनादन अई जायगा । ⁴³ पण यो पक्को(निश्चित) जाणो के अगर घर का मालेख के मालम होतो के चोर रात माय

(कदे) केनी बखत आयगा तो उ जागतो रेतो अने अपणा घर माय खाद लागवा नी देतो ।
⁴⁴ अस्तरां तम बी तियार रो । मनख को बेटो उनी घड़ी अई जायगा जदकी तम सोचोगा
 बी नी । ⁴⁵ "असो बिसासलायक अने अकलमन्द सेवक कुंण हे जिके उको मालेख
 सेवकहुंण का अदरे हाकिम बणाय, के सई बखत पे उणके भोजण (रोटा) दे ? ⁴⁶ धन हे उ
 सेवक जिके मालेख अईके उके असोज करतो पावे । ⁴⁷ हुं तमार से साँची कूं के उ उके
 अपणी अखी धन-सम्पती पे हाकिम बणायगा । ⁴⁸ पण उ बुरो सेवक अपणा हिरदा माय
 के ,म्हारा मालेख के आवामें अबी नरी देर हे , ⁴⁹ अने अपणा साती सेवकहुंण के मारवा-
 कुटवा लागे अने दारुड़ियाहुंण का साते खावा-पीवा मँडी जावे , ⁵⁰ तो उना सेवक को
 मालेख असादन आवेगा जदे उ उका आवा की आस नी करे अने असी घड़ी आवेगा जिके
 उ जाणें बी नी । ⁵¹ तो उ उके काठी सजा देगा अने ढोंगीहुंण का साते उके लाखी देगा । वां
 रोणो अने दांत पिसणो होयगा ।

25 ¹ तो सरग का राज को मिळान उनी दस कुमारीहुंण से करयो जायगा जो
 अपणो दियो के लईके लाड़ा से मिळवा सरु हिटी । ² उणकामें पांच मुख अने
 पांच अकलमंद थी । ³ क्योके मुखहुंण ने जदे दियो ल्यो तो उणने अपणा
 साते तेल नी ल्यो , ⁴ पण अकलमंदहुंण ने अपणा दियाहुंण का साते कुप्पीहुंण माय बी
 तेल ल्यो । ⁵ जदे लाड़ा के आवामें देरी हुईरी थी तो वी सगळी उंघवा लागी अने सोई गयी
 । ⁶ पण आदी राते तेड़ो(हेलो) आयो : 'देखो, लाड़ा अईरियो हे ! उकासे मिळवा चलो !' ⁷ तो
 वी सगळी कुमारीहुंण उठ्यई अने अपणो-अपणो दियो ठीक करवा लागी । ⁸ अने
 मुखहुंण ने अकलमन्द से क्यो, 'हमारे बी अपणा तेल माय से थोड़ोक दो, क्योके हमारा
 दिया बुजवा पे हे ।' ⁹ पण अकलमन्दहुंण ने ज्वाब दियो, 'नी, यो हमारा सरु हे अने
 तमारा सरु पुरो नी पड़े । भलो यो के तम दुकानदारहुंण कने जईके अपणा सरु मोलई लो
 ।' ¹⁰ जदे वी मोल लेवा सरु चली गयी तो लाड़ा अईग्यो , अने जो तियार थी, वी उका साते
 ब्याव-भोज माय भीतरे चली गयी । अने किमाड़ बन्द करी लाख्यो । ¹¹ पाछे वी दुसरी
 कुमारीहुंण बी अईके केवा लागी , 'मालख, हे मालेख, हमारा सरु किमाड़ खोलिदे !' ¹² पण
 उने ज्वाब दयो, 'हुं तमार से साँची कूं, हुं तमारे नी जाणुं ।' ¹³ इकासरु जागता रो ,क्योके
 तम नी तो उनादन के जाणो अने नीज उनी घड़ीके । ¹⁴ फेर, यो उना मनख सरिको हे जो
 जात्रा पे जावा सरु थो अने जेने अपणा सेवकहुंण के बुलाड़ी के अपणी सम्पती उणके
 समळई दी । ¹⁵ उने एक के पांच तोड़ा ,दुसरा के दो, अने तिसरा के एक ,याने हरेक के
 उकी काबिलियत का मुजब दयो, अने जात्रा पे चल्यो गयो । ¹⁶ जिके पांच तोड़ा मिळ्या

था, उने झट जईके उकासे ब्योपार करियो अने पांच तोड़ा हजु कमाया । ¹⁷ अस्तरां जिके दो तोड़ा मिळ्या था, उने बी दो हजु कमाया । ¹⁸ पण उ जिके एक मिल्यो थो, उने जईके खाड़ो खोदयो अने अपणा मालेख का तोड़ा उका माय छिपाड़ी लाख्यो । ¹⁹ नरादन पाछे उना सेवकहुंण को मालेख आयो अने उणकासे लेखो लेवा लाग्यो । ²⁰ तो उ जिके पांच तोड़ा मिळ्या था, उने पांच तोड़ा हजु लई के क्यो, 'मालेख, तने म्हारे पांच तोड़ा समलाया था । देख, म्हने इणकासे पांच हजु कमाया । ²¹ उका मालेक ने उकासे क्यो, 'साबास' भला अने बिसासलायक सेवक ! तु थोड़क माय बिसासलायक रियो, हुं थारे नरी चीजहुंण को हाकिम ठेरउंवां । अपणा मालेख का आनन्द माय सामिल हुईजा ।' ²² "जिके दो तोड़ा मिळ्या था, उने अईके क्यो, 'मालेख, तने म्हारे दो तोड़ा समलाया था । देखतो, म्हने दो हजु कमाया ।' ²³ मालेख ने उकासे क्यो, 'साबास' भला अने बिसासलायक सेवक ! तु थोड़क माय बिसासलायक रियो, हुं थारे नरीज चीजहुंण को हाकिम ठेरउंवां (बणउंवां) अपणा मालेख का आनन्द माय सामिल हुईजा ।' ²⁴ "फेर उ बी जिके एक तोड़ो मिळ्यो थो अईके केवा लाग्यो, हे 'मालेख, हुं जाणतो थो के तु निरदयी मनख हे ; जां बोय हयनी वां काटे अने जां बेरे हयनी वां से भेळो करे । ²⁵ तो हुं डरिग्यो अने जईके थारा तोड़ा के म्हने जमीन माय गाड़ी लाख्यो । जो थारो हे उके लईले ।' ²⁶ पण उका मालेख ने उके ज्वाब दयो, 'हे बुरा अने आळसी सेवक, तु यो जाणतो थो के जां हुं नी बोउं वां से काटूं, अने जां बीज नी बेरूं वां से भेळा करूं ; ²⁷ जदे तो थारे चइये थो के म्हारो तोड़ो (धन) सऊकारहुंण कने मेली देतो, जिकासे के हुं अईके अपणो धन ब्याज सईत उणकासे लई लेतो । ²⁸ इकासरु इकासे उ तोड़ो बी लईलो, अने जिका कने दस हे उके दईदो । ²⁹ क्योके हरेक जिका कने हे उके हजु बी दयो जायगा अने उका कने नरो हुई जायगा । पण जिका कने हयनी, उकासे उ बी लईलियो जायगा जो उका कने हे । ³⁰ 'इना मतकमउं सेवक के बायरे का इन्दारा माय लाखी दो, जां रोणो अने दांत पिसणो होयगा ।' ³¹ "पण जदे मनख को बेटो अपणी म्हेमा माय आयगा अने सगळा सरगदुत उका साते आयगा, तो उ अपणा म्हेमावान सिंगासण पे बिराजेगा । ³² अने सगळी जातहुंण उका सामे भेळी करी जायगा ; अने उ उनके एक-दुसरा से इकाड़ी करेगा, जसे ग्वाळो गाडर अने बकरीहुंण के इकाड़ी राखे । ³³ उ गाडरहुंण के अपणा जिवणा आड़ी, ने (बोकड़ी) बकरिहुंण के डाबा आड़ी करेगा । ³⁴ तो राजो अपणा जिवणा हात वाळाहुंण से केगा, 'हे म्हारा पिता का धन लोगहुंण, आव, उना राज का हाकिम बणो जो जगत का सुरु से तमारा सरु

तियार करयो ग्यो । ³⁵क्योके हुं भुको थो अने तमने म्हारे खावा सरु दयो। हुं तिरसियो थो अने तमने म्हारे पाणी पिवाड़ियो । हुं परदेसी थो तमने म्हारे अपणा घर माय ठेरायो । ³⁶हुं नांगो थो, तमने म्हारे लतरा पेराया ; बेमार थो,तमने म्हारी सुद ली; जेल माय थो, तम म्हारसे मिळवा आया ।' ³⁷" तो धरमी उके ज्वाब देगा,'परभु, हमने कदे भुको देख्यो अने जिमाड़ियो,ने तिरसियो देख्यो अने पाणी पिवाड़ियो ? ³⁸अने हमने कदे थारे परदेसी देख्यो अने अपणा घर माय ठेरायो ने नांगो देख्यो अने लतरा पेराया ? ³⁹हमने कदे थारे बेमार ने जेळखाना माय देख्यो अने थारसे मिळवा आया ?' ⁴⁰इ पे राजो उणके ज्वाब देगा,'हुं तमार से साँची कू के जो कंई तमने म्हारा इना नाना से नाना भई हुंण माय से कसाज एक का साते करियो उ म्हारा साते करियो ।' ⁴¹" तो उ डाबा आड़ी वाळाहुंण से केगा, हे सापित लोगहुंण,म्हार से दुर हुईके उनी सदा की लाय माय जई पड़ो जो सेतान ने उका दुतहुंण सरु तियार करी ग्यी हे ! ⁴²हुं भुको थो,तमने म्हारे खावा सरु नी दियो; तिरसियो थो,तमने म्हारे पाणी नी पिवाड़ियो; ⁴³परदेसी थो, तमने म्हारे अपणा घर माय नी ठेरायो; नांगो थो, तमने म्हारे लतरा नी पेराया; बेमार अने जेळखाना माय थो, तम म्हारी सुद लेवा नी आया ।' ⁴⁴इ पे वी उकासे पुछेगा, 'परभु, हमने कदे थारे भुको ने तिरसियो,ने परदेसी, ने नांगो, ने बेमार, ने जेळखाना माय देख्यो अने थारी सेवा नी करी ?' ⁴⁵तो उ उणके ज्वाब देगा,'हुं तमार से साँची कू के जो तमने इना नाना माय से कसा एक का साते नी करियो, उ म्हारा साते बी नी करियो ।' ⁴⁶इ लोग सदाकाळ तोड़ी सजा भोगेगा, पण धरमी सदा का जीवन माय जायगा ।"

26 ¹असो होयो के जदे इसु इ सगळी बातहुंण करी चुक्यो, तो उने अपणा चेलाहुंण से क्यो, ²"तम जाणो हो के दो दन बाद फसह को तेवार अइरियो हे अने मनख को बेटो सलीब (कुरुस) पे चड़ायो (टांग्यो) जावा सरु पकड़वायो जायगा ।" ³तो मुखपुरोहित अने लोगहुंण का सियाणाहुंण,काइफा नाम का महा पुरोहित (महापंडित) का अंगणा माय भेळा होया , ⁴अने उणने माय-माय इसु के छाने से पकड़वा अने मारी लाखणे को मनसुबो बणायो । ⁵पण वी केता था," तेवार का बखत नी, कंई असो नी होय के लोगहुंण माय दंगो भड़के जाय ।" ⁶जदे इसु बेतनिय्याह माय सिमोन कोइया का घरे थो , ⁷तो एक बंईरा सगंमरमर का बरतन माय बेमोल अतर लईके उका कने अई,अने जदे उ जिमवा बेठियो तो उका माथा पे रेड़ी लाख्यो । ⁸पण चेला या देखीके गुस्सा होया अने केवा लाग्या,"यो बरबाद कायसरु ? ⁹इना अतर के अच्छा पइसामें(मेंगो

बेचीके) बेचीके गरीब-गुरबाहुंण के पइसा बांटी देता ।" ¹⁰ या जाणीके इसु ने उणकासे क्यो,"तम इनी बंडराके कायसरु सताड़ो ? कंई इकासरु के उने म्हारा साते भलई करी ? ¹¹ गरीब-गुरबा तो तमारा साते सदा रे, पण हुं तमारा साते सदा नी रूवां । ¹² जदे उने म्हारा अंग पे यो अतर रेड्यो तो इकासरु रेड्यो के म्हारा गाड़िया जावा सरु म्हारे तियार करे । ¹³ हुं तमार से साँची कूं के अखा जगत माय जां कंई यो सुबसमिचार परचार करियो जायगा,वां इनी बंडरा का काम को बखाण बी उकी रियाद में करियो जायगा ।" ¹⁴ तो बाराहुंण माय से एक, जिको नाम यहुदा इस्करयोती थो,मुखपुरोहित कने ग्यो, ¹⁵ अने उने क्यो,"अगर हुं इसु के तमारा हाते करी दुं तो तम म्हारे कंई दोगा ?"अने उणने उके चाँदी का तीस सिक्का तोलिके दर्इया । ¹⁶ जद से उ उके पकड़वाणे सरु अच्छा मोका का तलासमें रेवा लाग्यो । ¹⁷ फेर चेला अखमीर रोट्टा का तेवार का पैलांदन, इसु कने अईके पुछवा लाग्या,"तु कां चावे के हम थारा सरु फसह खावाकीतियारी करां ?" ¹⁸ उने क्यो,"नगर माय फलाणा जणाकने जईके उकासे को, 'गरु के ,म्हारो बखत कने हे । म्हारे अपणा चेलाहुंण का साते थारा यां फसह को तेवार मनाणो हे' ।" ¹⁹ तो इसु का हुकम मुजब चेलाहुंण ने फसह की तियारी करी । ²⁰ जदे सांज होई तो उ बारा चेलाहुंण का साते जिमवा बेठियो । ²¹ जदे वी जिमी रिया था तो उने क्यो,"हुं तमार से साँची कूं के तमारा माय से एक म्हारे पकड़वायगा ।" ²² इ पे वी घणा दुःखी हुईके एक-एक करिके उकासे पुछवा लाग्या,"परभु, हुं तो नी हुं, नी ?" ²³ उने क्यो," उ जिने म्हारा साते कटोरा माय हात लाख्यो ,उज म्हारे पकड़वायगा । ²⁴ मनक का बेटा के तो,जसो उका बारामें लिक्ख्यो ग्यो हे , जाण्योज हे,पण धिक्कार उ के जिकासे मनख को बेटो पकड़वायो जायगा ! उना मनख सरु भलो होतो के उ जनमीज नी लेतो ।" ²⁵ तो उके पकड़वाणे वाळो याने यहुदा ने क्यो,"रब्बी, कंई उ हुं हे ?" उने क्यो," तने खुदज कई थो । ²⁶ जदे वी जिमी रिया था, इसु ने रोट्टो ल्यो अने आसीस मांगीके तोड़ियो अने चेलाहुंण के दर्इके क्यो," लो खाव; या म्हारी काया हे ।" ²⁷ फेर उने कटोरो लईके धनवाद करियो अने उणके देता होया क्यो,"तम सगळा इका माय से प्यो, ²⁸ क्योके यो करार को म्हारो लोई हे, जो नरा लोगहुंण सरु पापहुंण की मांफी सरु बिवाड़ियो जावा पे हे । ²⁹ पण हुं तमार से कूं के अंगुर को यो रस अबी से लिके उना दन तोड़ी नी पीउंवां जत्तक अपणा पिता का राज माय तमारा साते नवो नी प्यूं ।" ³⁰ भजन गावा का बाद वी जेतुन परबत पे चल्या गया । ³¹ जदे इसु ने उणकासे क्यो,"आज राते तम सगळा म्हारी वजा से ठोकर खावगा , क्योके

लिक्ख्यो हे , हुं ग्वाळा के मारुंवा अने खडु की गाडरहुंण खक्कळ- बक्कळ हुई जायगा ।" ³²पण जिवता (जिन्दा) होवा का बाद तमार पैलां गलील के जउंवां ।" ³³इ पे पतरस ने उकासे क्यो , "चाये सगळा का सगळा थारी वजा से ठोकर खावे तो खावे, पण हुं कदी नी खउंवां ।" ³⁴इसु ने उकासे क्यो, "हुं तमार से साँची कू के आज ज राते, मुरगा का बांग देवा से पैलां, तु तीन बार म्हारे इनकारेगा ।" ³⁵पतरस ने उकासे क्यो, "चाये म्हारे थारा साते मरणो बी होय, हुं थारो इनकार नी करुंवां ।" सगळा चेलाहुंण ने बी असीज बात करी । ³⁶जद इसु उणका साते गतसमनी नाम की जगा माय आया, अने उने अपणा चेलाहुंण से क्यो, "जतक हुं वां जईने पराथना करूं, तम यांज बेठो ।" ³⁷उने अपणा साते पतरस अने जब्दी का बेटाहुंण के लिया अने दुःखी ने (बेकळ) बेचेन होवा लाग्यो । ³⁸फेर उने उणका से क्यो, "म्हारो हिरदो घणो उदास हे, यां तोड़ी के हुं मरवा पे हुं । यांज रुको अने म्हारा साते जागता रो ।" ³⁹फेर उ उणका से थोड़ोक अगड़े बड़ियो अने (सास्टांग) मुन्डा का बळ पड़िके या पराथना करवा लाग्यो: "हे म्हारा पिता, अगर हुई सके तो यो कटोरो म्हार से टळी जाय । फेर बी म्हारी नी, पण थारी मरजी पुरण होय ।" ⁴⁰पाछो उ चेलाहुंण कने आयो, अने उणके सोता पईके उने पतरस से क्यो, "कई तम लोग म्हारा सरु एक घड़ी बी नी जागी सक्या ?" ⁴¹जागता रो अने पराथना करता रो के तम अजमाइस माय नी पड़ो । आतमा तो तियार हे पण काया कमजोर हे ।" ⁴²फरे उने दुसरी दफा जईके या पराथना करी : "हे म्हारा पिता, अगर यो म्हारा प्या बिना नी टळी सके, तो थारी मरजी पुरन होय ।" ⁴³उने पाछो अईके उणके सोता पाया , क्योके उणकी आँखहुंण नींद से बोझळ थी । ⁴⁴उ उणके पाछो छोड़िके चल्यो ग्यो अने पाछो वाज बात कईके तिसरी दफा पराथना करवा लाग्यो । ⁴⁵फेर उने चेलाहुंण कने अईके क्यो, "कई तम अबी तोड़ी अराम से सोईरिया हो ? देखो, बखत अईग्यो हे अने मनख को बेटो पापीहुंण का हाते पकड़ायो जाय हे ।" ⁴⁶उठ्याव, चलां । देखो म्हारो पकड़वाणे वाळो कने अई पौंच्यो हे ।" ⁴⁷जदे उ यो कईज रियो थो तो देखो, यहुदा जो बाराहुंण माय को एक थो अइग्यो, अने उका साते तरवार अने लट्टहुंण लई होई एक बड़ी भीड़ थी जिके मुख पुरोहितहुंण अने लोगहुंण का सियाणाहुंण ने मोकली थी । ⁴⁸पकड़वाणे वाळा ने उणके यो कईके इसारो यो थो :जिके हुं चुम्मो लुं , उज हे । उके पकड़ी लिजो ।" ⁴⁹उ झट इसु कने अइके बोल्यो, "हे रब्बी, परणाम !" अने उके चुम्यो । ⁵⁰इसु ने उका से क्यो, दोस, जिना काम सरु तु आयो उके कर ।" जद उणने उका कने अईके इसु के पकड़ियो अने गिरफदार करियो । ⁵¹फेर देखो, इसु का सातीहुंण माय से एक ने तरवार हेड़िके म्हापुरोहित का सेवक पे चलाड़ी अने

उको कान काटी लाख्यो । ⁵² तो इसु ने उका से क्यो, "अपणी तरवार म्यांन माय राख, "क्योके जो तरवार उठाड़े वी सगळा तरवार से नास करिया जायगा । ⁵³ तु कंई सोचे के हुं अपणा पिता से बिणती नी करी सकतो ? अने कंई उ झट बारा सेनाहुंण से जादा सरगदुत के म्हारे नी समळई सकतो ? ⁵⁴ पण जद पवितर सास्तर को लेख कसे पुरण होयगा के असोज होणो जरूरी हे ?" ⁵⁵ फेर इसु ने भीड़ से क्यो , " कंई तम तरवार अने लड्डहुणं लईके म्हारे पकड़वा अया हो मानो के हुं कोई डाकू हुं ? हुं हरदन मन्दर माय बेठिके परबचण या करतो थो अने तमने म्हारे नी पकड़ियो । ⁵⁶ पण यो सगळो इकासरु होयो के नबीहुंण को लेख पुरण होय।" तो सगळा चेला उके छोड़िके भागिग्या । ⁵⁷ जिणने इसु के पकड़ियो थो, वी उके म्हापुरोहित काइफा कने लईग्या, जां सास्तरी अने सियाणा भेळा था । ⁵⁸ पतरस बी थोड़िक दुरी पे उका पछड़े-पछड़े चलिके म्हापुरोहित का आंगणा तोड़ी पोंच्यो अने भितरे जईके नतीजो देखवा सरु पेरादारहुंण का साते बेठिग्यो । ⁵⁹ परधान पुरोहित अने अखी म्हासबा इसु का बिरोधमें झुंटी गवई पावा की कोसिस करता रिया, जिकासे के वी उके मारी लाखे । ⁶⁰ पण नरा झुंटा गवाहुंण का आणे पे बी, वी कंई नी करी सक्या । आखरीमें दो ने अईके क्यो, ⁶¹ "इना मनख ने क्यो, 'हुं परमेसर का मन्दर के ढळईके उके तीनदन माय पाछो बणई दुंवां (सकतो हुं) ।" ⁶² तो म्हापुरोहित ने उबो हुईके उकासे क्यो, "कंई तु ज्वाब नी दर्ईरियो ? इ लोग थारा बिरोधमें कंई गवई दर्ईरिया हे ?" ⁶³ पण इसु चुपरियो । इ पे म्हापुरोहित ने उकासे क्यो, हुं जिवता परमेसर की सोगन दूं , के अगर तु परमेसर को बेटो मसीह हे तो हमार से कईदे ।" ⁶⁴ इसु ने उकासे क्यो, "तने खुदीज क्यो । फेर बी हुं थारसे कूं के अब से तम मनख का बेटा के सगळा से सक्तीमान का जिवणा आड़ी बेठ्या होया अने सरग का बादळाहुंण पे आता होया देखोगा ।" ⁶⁵ इ पे म्हापुरोहित अपणा लतरा फाड़ीके केवा लाग्यो, इने परमेसर को (निन्दा)अपमान करियो । अबे हमारे गवाहुंण की कंई जरुवत ? देखो, तम यो अपमान सुणिचुक्या हो । ⁶⁶ अबे तमारो कंई बिचार हे ?" उणने ज्वाब द्यो , उ मोत कि सजा का लायक हे !" ⁶⁷ तो उणने उका मुन्डा पे थुक्यो, अने मुक्काहुंण से मारयो अने कोई-कोइ ने थापड़ मारी के क्यो, ⁶⁸ " हे मसीह, अगमबाणी करिके हमारे बताड़ :केने थारे मारियो ?" ⁶⁹ पतरस आंगणा माय बायरे बेठ्यो होयो थो के एक दासी ने उका कने अईके क्यो, "तु बी तो गलील का इसु का साते थो !" ⁷⁰ पण उकासे इन्कार करतो होयो उना सगळा का सामे उने क्यो, " हुं नी जाणु के तम कंई कईरी हे ।" ⁷¹ जदे उ बायरे डेळी पे ग्यो तो एक हजु

दासी ने उके देखीके उणकासे क्यो, "यो बी तो नासरत का इसु का साते थो ।" ⁷² तो उने सोगन खईके पाछो इन्कार करियो : हुं इना मनख के नी जाणुं ।" ⁷³ थोड़ीक देर का बाद उणने जो वां उब्बा था पतरस का कने अइके क्यो, "निश्चितज तु बी उणका माय से हे, क्योके थारी बोली थारे परगटे हे ।" ⁷⁴ तो उ धक्कारवा अने सोगन खावा लाग्यो: " हुं उना मनख के नी जाणुं ।" अने झट मुरगा ने बांग दई । ⁷⁵ तो पतरस के वा बात जो इसु ने कई थी रियाद अईग्यी: "मुरगा का बांग देवा से पैलां तु तीन बार म्हारे इन्कारेगा ।" अने उ बायरे जईके फुटी-फुटी के रोवा लाग्यो ।

27 ¹ जदे दन उग्यो तो सगळा परधान पुरोहितहुंण अने लोगहुंण का सियाणाहुंण ने इसु का बिरोदमें एको करियो ,के उके मारी लाखां । ² फेर उणने उके बांधो अने लई जईके राजपाल के समळई द्यो । ³ जदे यहुदा, जेने उके पकड़वायो थो, या देखीके के इसु दोसी ठेरायो जईरियो हे, तो उ पस्तायो, अने चाँदी का तीस बटकाहुंण के परधान पुरोहितहुंण अने सियाणाहुंण के फेरीके उणकासे क्यो, ⁴ "म्हने पाप करियो हे । म्हने निरदोस का लोई को सोदो करियो हे ।" पण उणने क्यो, इकासे हमारे कंई? तुझ जाण ।" ⁵ तो उ उना चाँदी का सिक्काहुंण के मन्दर माय फेंकी के चल्यो ग्यो अने जईके (गळामाय) फँदो लगई ल्यो । ⁶ तो मुखपुरोहितहुंण ने चाँदी का उना सिक्काहुंण के लईके क्यो, " इणके मन्दर का खजाना माय राखणो अच्छो हयनी, क्योके यो लोई को दाम हे ।" ⁷ उणने माय-माय सला करी अने उना पईसा से परदेसीहुंण के दफणाने सरु कुमार को खेत मोलिल्यो । ⁸ इनी वजा से आज बी उ खेत ' लोई को खेत ' केवाय हे । ⁹ तो उ बचण जो यरमियाह नबी से केवाग्यो थो पुरण होयो : उणने चाँदी का तीस सिक्का ल्या, याने उ दाम जिके इसराइल की ओलादहुंण ने उका सरु ठेरायो थो । ¹⁰ अने उणने उके कुमार का खेत सरु दई द्या, जसोके परभु ने म्हारे हुकम द्यो थो ।" ¹¹ तो इसु राजपाल का सामे उबो होयो अने राजपाल ने उकासे पुछ्यो, " कंई तु यहुदिहुंण को राजो हे ?" सई, तु खुदज के हे ।" ¹² अने जदे मुखपुरोहित ने सियाणा उ पे दोस लगाड़ी रिया था तो उने कई ज्वाब नी द्यो । ¹³ तो पिलातुस ने उकासे क्यो, "कंई तु नी सुणे, इ थारा बिरोदमें कतरी बातहुंण की गवई दईरिया हे ?" ¹⁴ पण उने उके एक बी बात को ज्वाब नी द्यो । इकासे राजपाल के घणो अचम्बो होयो । ¹⁵ राजपाल की या रीत थी के तेवार का बखत कसा एक मुलजिम के जिके लोग चाता था, छोड़ि लाख्या करतो थो । ¹⁶ अने उना बखत उकी केद माय बरअब्बा नामको कुख्यात मुलजिम

थो । ¹⁷ जदे वी भेळा होया तो पिलातुस ने उणकासे क्यो," तम किके चाव के हुं तमारा सरु छोड़ि लाखुं ? बरअब्बा के, या इसु के जो मसीह केवाय ?" ¹⁸ क्योके उ जाणतो थो के उणने उके जळन से पकड़ायो हे । ¹⁹ जदे उ न्याव-सिंगासण पे बेठियो तो उकी घराळी ने उके केवाड़ी मोकलियो,"इना धरमी मनख का मामला माय हात मति लाखजे, क्योके आज राते म्हने सपना माय उकी वजासे घणो दुःख उठाड़ियो हे । ²⁰ पण मुखपुरोहित अने सियाणाहुंण ने भीड़ के भड़कई,के वी बरअब्बा के छोड़वा अने इसु के मारी लाखणे की मांग करे । ²¹ तो राजपाल ने ज्वाब द्यो,"इना दोई माय से किके चाव हो, के हुं तमारा सरु छोड़ि लाखुं ?" उणने क्यो,"बरअब्बा के ।" ²² पिलातुस ने उनकासे क्यो,"फेर हुं इसु के ,जो मसीह केवाय , कंई करुं ?" उना सगळा ने क्यो, " उ सलीब चड़ायो जाय ।" ²³ उने क्यो," कायसरु ? उने कंई बुरई करी ?"पण वी हजु बी जादा चिल्लई के केवा लाग्या, उ सलीब प चड़ायो जाय !" ²⁴ जदे पिलातुस ने देख्यो, के म्हारसे कंई बी नी बणिरियो हे अने दंगो होवा पे हे, तो उने पाणी ल्यो अने भीड़ का सामे अपणा हात धोईके क्यो, हुं इना मनख का लोई से बरी हुं । तमीज जाणो ।" ²⁵ इ पे लोगहुंण ने ज्वाब द्यो , "इको लोई हमार पे अने हमारी ओलाद पे रे (होय) !" ²⁶ तो उने बरअब्बा के तो उणका सरु छोड़ियो,पण इसु के कोड़ा लगवईके सलीब पे चड़ाया जावा सरु समळई द्यो । ²⁷ तो राजपाल का सेनिक (सिपई), इसु के राजमेल माय लई गया, अने वां उका चारिमेर अखा रोमी सेना-दळ के भेळा करि ल्या । ²⁸ फेर उका लतरा उतारिके उणने उके गाड़ो लाल रंग को चोगो पेरायो । ²⁹ अने कांटा को मुगुट गुंथीके उणने उका माथा पे धरियो अने उका जिवणा हात माय सरकंडो (एक तरां कि जाड़ा घांस की किमड़ी) द्यो । फेर उका अगड़े गोड़ा टेकी के वी उकी मसखरी करिके केवा लाग्या," हे यहुदिहुंण का राजा, थारी जय हो !" ³⁰ उणने उका पे थुक्यो,अने सरकंडो लईके वी उका माथा पे मारवा लाग्या । ³¹ मजाक उड़ावा का बाद उणने उको चोगो उतारियो अने उकाज लतरा उके पेरई द्यो, अने सलीब पे चड़ावा सरु लई चल्या । ³² जदे वी बायरे हिटीरिया था तो उणके सिमोन नामको एक कुरेनी मिळ्यो । उणने उके बेगारीमें पकड़ियो के सलीब उठईके लई चले । ³³ अने जदे वी उनी जगा पे आया जो गुलगुता केवाय, याने 'खोपड़ी की जगा , ' ³⁴ तो उणने उके पित्त मिळ्यो होयो अंगुर को रस पीवासरु द्यो, पण उने चाखीके पीणो नी चायो । ³⁵ अने जदे वी उके सलीब पे चड़ई चुक्या तो उणने चिढ़ी लाखी के उका लतरा के माय-माय बांटी ल्या । ³⁶ अने वां बेठिके, वी उको पेरो देवा लाग्या । ³⁷ अने उणने उका माथा अदरे उको दोसपत्तर

लगाड़ियो जिमें लिक्ख्यो थो, "यो यहूदिहंण को राजो इसु हे ।" ³⁸ उना बखत उणने उका साते दो डाकुहंण के बी सलीब पे टांग्या, एक के उका जिवणा आड़ी अने दुसरा के उका डाबा आड़ी । ³⁹ वां से आवा-जावा वाळा उकी निन्दा करिरिया था अने माथो हलाड़ी-हलाड़ी के, ⁴⁰ कईरिया था, "हे मन्दर का ढळ्आणे अने तीन दन माय बणावा वाळा, अपणा आप के बचाड़ ! अगर तु परमेसर को बेटो हे तो सलीब पे से उतरिया ।" ⁴¹ अस्तरां मुख पुरोहित बी सास्तरी अने सियाणाहंण का साते उकी मसकरी करता होया कईरिया था , ⁴² इने दुसरा के बचाड़िया, पण अपणा आपके नी बचाड़ी सकतो । यो इसराइल को राजो हे -अबे सलीब पे से उतरे तो हम इ पे बिसास करांगां । ⁴³ यो परमेसर पे भरोसो राखे ; अगर उ इकासे खुस हे तो अबी छुड़ई ले, क्योके उने क्यो थो, ' हुं परमेसर को बेटो हुं ।' " ⁴⁴ जो डाकु उका साते सलीब पे लटकाड़िया गया था, वी बी अस्तरां उकी निन्दा करिरिया था । ⁴⁵ दफोर से लईके तीन बजां तोड़ी अखा देस माय इन्दारो घिरियो रियो । ⁴⁶ तीन बज्या का करीब इसु उंच्ची आवाज से चिल्लाड़यो, "एली, एली सबक्तनी ?" याने, " हे म्हारा परमेसर, हे म्हारा परमेसर तने म्हारे कायसरु छोड़ियो ?" ⁴⁷ वां उब्ब्या होया माय से थोड़ाक ने यो सुणीके क्यो, "यो मनख एलियाह के तेड़ी रियो हे ।" ⁴⁸ उणका माय से झट एक ने दोड़िके स्पंज के सिरका माय डुबाड़ियो ने सरकन्डा पे धरिके उके चुसवा सरु घो । ⁴⁹ पण बाकि लोगहंण ने क्यो, "देखां," एलियोह उके बचाड़वा सरु आवे के नी ।" ⁵⁰ तो इसु ने पाछी उंच्ची अवाज माय चिल्लाड़िके पराण छोड़ि घा । ⁵¹ अने देखो, मन्दर को परदो अदरे से निच्चे तोड़ी फाटिके दो टुकड़ो हुईग्यो । धरती डोली गयी, सिल्लाहंण (चटखी पड़ी) तड़की गयी, ⁵² ने कबरहंण खुली गयी, अने सोया होया नरागंज पवित्तर लोगहंण की लोथ (जिन्दा हुई गयी) जिन्दी उठ्याई । ⁵³ अने उका पाछा जिन्दा होवा का बाद वी कबरहंण माय से हिटीके पवित्तर नगर माय गया अने नरा के नजर आया । ⁵⁴ तो सुबेदार अने जो लोग उका साते इसु को पेरो दईरिया, जदे उणने धरती कांपणो ने इनी घटणाहंण के देख्यो तो घणा डरिके क्यो, " साँची यो परमेसर को बेटो थो !" ⁵⁵ अने वां नरीगंज बंईराहंण जो इसु की सेवा करती होई गलील से उका पछड़े चल्यई थी, दुरा से यो देखी री थी । ⁵⁶ उणकामें मरियम मगदलीनी, याकुब अने युसफ की मेतारी मरियम, अने जब्दी का बेटाहंण की मेतारी थी । ⁵⁷ जदे सांझ होई तो अरमितियाह को युसफ नामको एक धणी मनख आयो । उ बी इसु को चेलो थो । ⁵⁸ जदे उने पिलातुस कने जईके इसु की लोथ मांगी तो पिलातुस ने उके देवाड़ी दई । ⁵⁹ तो युसफ ने लोथ के लई जईके साफ मलमल का लतरा माय लपेटी, ⁶⁰ ने उने अपनी नवी कबर माय धरी, जो उने चट्टाण माय खोदाड़ी थी । फेर एक घणो बजनदार फतर कबर का मुन्डा पे रड़कई के

चल्यो ग्यो । ⁶¹ मरियम मगदलीनी अने दुसरी मरियम वां कबर का सामे बेठी थी । ⁶² दुसरा दन, याने तियारी का दन का एक दन पाछे, मुखपुरोहितहुंण अने फरीसीहुंण ने पिलातुस कने भेळा हुईके क्यो, ⁶³ महाराज, हमारे रियाद हे के उना धोकाबाज ने अपणा जितेजी क्यो थो, 'तीन दन पाछे हुं पछो जिन्दो हुई जउंवां । ⁶⁴ तो हुकम दे के तिसरा दन तोड़ी कबर की चोकसी करी जाय, कई असो नी होय के चेलां अईके लोथ के चोरी लई जाय अने लोगहुंण से के, उ मरिया माय से जी उठ्यो हे ।' जद तो पाछलियो धोको अगलिया से बी बुरो होयगा ।" ⁶⁵ पिलातुस ने उणकासे क्यो, "तमारा कने पेरादार हे; जसो बी उको बन्दोबस करी सको, वसोज करो ।" ⁶⁶ तो उणने जईके कबर की चोकीदारी करई ने पेरादार बेठाड़ीके फत्थर के सील बी करी लाख्यो (मोहर बी लगाड़ी लाखी) ।

28 ¹ सबत् का बितवा पे, हसा का पेलां दन परोड़ाज(दन उगेज) मरियम मगदलीनी अने दुसरी मरियम कबर देखवा अई । ² अने देखो, घणी जोरसे धरती कांपी , क्योके परमेसर को एक दुत सरग से उतरिके आयो अने फत्थर के इकाड़ी रइकई के उ पे बेठिग्यो । ³ उको रुप बिजळी जसो अने उका लतरा बरफ सरिका धोळा था । ⁴ पेरुवाहुंण उका डर से कांपी उठ्या अने मरिया जसा हुईग्या । ⁵ सरगदुत ने बंईराहुंण से क्यो, "डरो मती, क्योके हुं जाणु के तम इसु के जिके सलीब पे टांगी यो थो सोदिरी हो । ⁶ उ यां हयनी, क्योके उ अपणा केवा का मुजब जिन्दो हुईग्यो (जी उठ्यो हे) । आव,उनी जगा के देखो जां उ पड़ियो होयो थो । (जां उके धरियो थो) ⁷ उका चेलाहुंण के झट जईके बताड़ो के उ मरिया माय से जिन्दो उठ्यायो, अने देखो, उ तमार से पैलां गलील के जायगा - वां तम उके देखोगा । देखो, म्हने तमारे बताड़ि यो हे ।" ^{AT028008} ⁸ इ पे वी डरी अने घणी खुसी का साते झट कबर से पलटी अने चेलाहुंण के यो समिचार देवा सरु दोड़ी पड़ी । (पाटी दई) ⁹ जद देखो, इसु उणकासे मिळ्यो अने उणके परणाम करियो । वी उका कने अई अने उणने उका पग पकड़िके उके दण्डवत् करियो । ¹⁰ तो इसु ने उणकासे क्यो, "डरो मती । जाव अने म्हारा भईहुंण से को के वी गलील के चल्यो जावे, अने वां वी म्हारे देखेगा ।" ¹¹ वी रस्ता मायज थी के देखो, पेरुवाहुंण माय से थोड़ाक ने नगर माय जईके पुरो हाल मुखपुरोहितहुंण से कई सुणायो । ¹² तो उणने सियाणाहुंण का साते भेळा हुईके एको करियो अने सिपईहुंण के नरा रुप्या दईके ¹³ क्यो, " लोगहुंण से को जो, 'राते जदे हम सोईरिया था तो उका चेलाहुंण अईके उके चोरी

लईग्या ।" ¹⁴अने अगर राजपाल का कान तोड़ी या बात पोंचे तो हम उके समझाड़ी दांगा अने तमारे संकट से बचई लांगा ।" ¹⁵उणने रुप्या लईके जसो सिखाड़ियो (बताड़ियो) थो वसोज करियो । या बात यहुदिहुंण माय दूर-दूर तोड़ी फेली गयी जो आज तोड़ी चलणमें हे । ¹⁶बादमें, ग्यारा चेलां गलील का उना परबत पे गया जिके इसु ने बताड़ियो थो, ¹⁷अने जदे उणने उके देख्यो तो उके दण्डवत् करियो, पण कोई-कोई के सक होयो । ¹⁸तो इसु ने उणका कने अईके क्यो,"सरग अने धरती को सगळो हक म्हारे द्यो ग्यो हे । ¹⁹इकासरु जाव, अने सगळी जात का लोगहुंण के चेला बणाव ने उणके बाप,बेटो अने पवित्तर आतमा का नाम से बपतिस्मो दो, ²⁰अने जो जो हुकम म्हने तमारे द्या उको पाळन करनो सिखाड़ो । अने देखो, हुं युग का आखिर तोड़ी सदा तमारा साते हुं ।"